



松陵文獻

獻集卷六

人物志六

邑人潘樾章力田

長樂縣志
振鐸西
編卷七



明

孫從龍

孫從龍字汝化少警敏凝重時有倭警書舍多窺伺
從龍反身面壁而讀人以此知其不凡隆慶二年舉
進士授行人遷刑部郎中錄囚廣西多所平反尤加
意於永戍曰古者罪不孥况世世乎一人負冤災及

子孫是重於大辟也然法比精密主者不能異出知廣信府廣信當孔道素苦供億從龍力行儉約減常費大半永豐舊有礦盜嘉靖間封禁諸山設巡司守之從龍議移鉛山把總於柘陽省巡司弓兵以益餉又坑兵以餉薄多虛籍從龍以爲增餉不若汰兵而實給之皆報可自是諸山無盜警遷江西副使申飭郵政省金錢二千餘偶閱陶靖節集慨然引疾歸生平學問得之易爲多王世貞尤推服之著叅疑內外編卒年六十三今列鄉賢祠子履恒萬曆二十二年

舉於鄉終博羅知縣好言兵事有武經商隱數卷

潘志伊

潘志伊字伯衡嘉靖四十四年進士授定州知州州號衝疲丁糧外舊有門銀千兩志伊曰有田則有租有身則有庸安用門銀爲遂罷之達軍數千自成祖時內徙設都司領之桀驁難制志伊曰華夷均赤子軍躪吾民治勿貸民有詬鬪者亦繩以法境內大安轉南京刑部郎中以憂去萬曆二年起爲刑部郎中先是有指揮周世臣者故慶雲侯壽之裔孫也居東

城小巷家止一婢曰荷花世臣夜爲盜所殺

按實錄及馮少

室集俱書周世臣先曾祖不遇紀事獨作周偉不知何故今從實錄諸書巡捕張國維坐

事任奉乃執其奴王奎誣以與荷花奸謀殺世臣下

法司訊志伊曰疑獄也姑緩之會左侍郎翁大立署

部事國維以獄未成奉不得復陰結大立左右爲言

司官受賄畱獄大立信之促具獄志伊持不可強之

乃請移他司會勘而他司郎中徐一忠等承指擬奎

等俱辟是秋當決志伊力爭得止四年冬恤刑山東

遂不得預部議而奎等竟決矣尋出知九江府而京

師獲大盜朱國臣等自言殺世臣者我也奎等固無

與於是給事中周良寅等劾大立失入之罪坐削職

而志伊亦降補陳州知州歲大祲發廩賑救出所節

省丁糧千金全活甚衆十一年稍遷知南康府宋白

鹿洞書院先爲當事所毀學田三十餘頃悉廢志伊

力復之又五年遷按察副使袁州兵備會歲旱米貴

民采蕨食志伊預計倉庫之羨酌被災輕重差次給

之民始獲甦十九年遷陝西行太僕寺卿甘肅馬政

久弛志伊親閱馬高下定值盈縮綜覈有法人不敢

欺二年改廣西叅政初志伊在陳州州人好盜有諸生掠其族孤寡志伊以白督學孫丕揚丕揚怒釋諸生不問而內嘆之至是爲吏部尚書竟以考察論罷猶坐王奎舊事云所著有山東問刑條議不遇紀事諸書子錫祚字永甫以貢士爲撫寧衛經歷考滿當馳封上章力辨王奎事爲有司所格遂不受封遷湖廣布政司理問卒於官好古博識在撫寧著南陽問荅策遼事如指掌焉

吳允夏曰公以陳州時曾持正忤學使者已而學使

者晉冢宰掌計事掎拾王奎舊案中以考功距爲郎時已三紀去被謫時亦十有八年矣謫之後京察者三外計者四忽爲索瘢世有此黜幽之典耶按乙未主計者爲富平孫丕揚及考功郎薛時馨所去取頗違公論今以公一人徵之益信

曾孫櫺章曰少時讀先大叅所著不遇紀事至王奎一獄不勝扼腕曰甚矣執法之難也謹按神宗實錄云王奎罪案未決刑部署印左侍郎催該司郎中潘志伊速結此獄志伊以獄情重大請委官會問乃委

郎中王三錫徐一忠研審而王奎與荷花盧錦俱坐
凌遲萬曆四年十月處決矣後禮科給事中蕭彥劾
云王奎之死起於巡捕把總張國維之妄拏而成於
刑部侍郎翁大立之輕信潘志伊請多官以爲已地
似有規避之情王三錫徐一忠旣會問而漫不叅詳
不無扶同之弊俱下部覆上以翁大立率意議刑有
傷好生念已去任革其原職張國維遣戍潘志伊降
一級徐一忠王三錫調外任此當日得罪始末公不
過爲法受過已耳馮時可紀事云左侍郎翁大立自

南來有親族數十人寓京師張國維徧賂之國維亦
自至涿州迎侍郎侍郎問京師有何事國維曰事在
邸報小人不必言獨部中有逆犯王奎等司官將反
其獄人心頗不服非指揮所敢言也於是翁之諸黨
盡言王奎鉅富持數萬金行賂非卽決之無以厭衆
志翁遽信之署部次日卽語郎中潘志伊令速成獄
志伊力言三人之寃翁大怒曰汝受奎賄耶再三強
潘問潘必不可請移他署會勘翁乃命他署郎中徐
一忠王三錫等會勘一忠等復猶豫不敢書獄翁大

松陽文獻 卷六 五
嘗一日四五趣辦稿諸郎揣堂官意堅爭之無益尋
奏當成荷花王奎俱凌遲盧錦斬命下卽決又四年
而始得真盜乃故宰夫朱國臣也時可所紀得之見
聞頗真但命下卽決一語尚非事實考甲戌乙亥兩
歲審決皆以公力爭之故得展期迄於丙子公有恤
刑之行是固奎等命卒之日也然則公於此獄所謂
求其生而不得則死者與我皆無恨耳而乙未大計
猶擴微文以快私忿孫公之量於是乎不弘矣近閱
天啓邸報得先大父所上訟寃書詳明惋惻爲之涕

下而科臣抄叅直以年遠難明已之噫後生新進耳
目不廣近且弗察遠於何有使非國史大書特書則
先公明允之績終湮滅而不彰矣可勝嘆哉

袁黃

袁黃初名表字坤儀邑之趙田人地與嘉善接因入
籍嘉善家世以醫顯父仁字良貴有詩名工書法黃
少負逸才於三乘四部星雒之書無不研究聲譽籍
甚萬曆五年會試擬第一人以策譏權倖不果十四
年始成進士授寶坻知縣二十年擢兵部職方司郎

松陽文獻 卷六 六
中贊畫東事訪求奇士得山陰馮仲纓吳人金相置
幕下是時倭酋行長已渡大同江繞出平壤西界朝
廷所遣辨士沈惟敬三人倭營議封貢罷兵行長許
之使小西飛等來與大將軍李如松約以明年正月
入平壤受冊退師黃以問仲纓曰倭請封信乎曰信
東事可竣乎曰未也黃問何謂也仲纓曰平秀吉初
立國內未附行長關白之嬖人欲假寵於我以自固
故曰信也如松恃寵桀驁新有寧夏功加提督爲總
兵官本朝未有也彼肯令一游士掉三寸舌成東封

之績而束甲以還乎彼必詐唯敬借封期以襲平壤
襲而不克則敗軍襲而克則敗封故曰東事未可竣
也相曰襲平壤必克克而驕必大敗敗封與敗軍兩
有之黃曰善正月如松果襲平壤入之所部遼兵割
麗人首以獻功黃面數如松以襲封殺降之罪如松
大恨與贊畫郎中劉黃裳比而媒孽其短會如松乘
勝進取王京遇伏大敗於碧蹄館退保開城而倭酋
行長據龍山清正自咸鏡趨截鴨綠江經略宋應昌
時駐定州前後皆阻倭計無所出馮仲纓言於黃曰

松陵文獻 卷六 七
師老矣退又不可清正狡而悍藐行長而貳於關白願與金相偕使可撼而間也黃以告應昌應昌乃遣仲纓往清正盛軍容迎之仲纓立馬大言曰諸酋恃強不知天朝法度汝故主源道義受天朝封二百餘年汝輩世世陪臣也汝敢慢天朝忍遂忘故主乎清正者薩摩君之弟爲平秀吉所畏故仲纓以故主動之清正嚙指曰唯唯仲纓就帳宣言曰汝巨州名將故主之介弟今破王京者行長也議封典者行長也彼以一弄臣儼然主封貢挾天朝以爲重而汝雄踞

海濱自甘牛後心竊耻之且持此安歸乎今與我定約急還王子陪臣退兵決封貢勿令冊封盛典出自弄臣此亦千古之一時也清正手額曰請奉教解所著團花戰袍與仲纓歃血約盟令王子陪臣謁仲纓叩頭謝訂期歸國卽日自王京解兵而東仲纓之往也金相度黃裳輩內忌之必且以通倭坐仲纓爲中黃地於是率健卒二千人分伏南山觀音洞邀其歸師殺倭九十餘生禽其將葉實仲纓歸黃裳果以通倭爲言仲纓取相所斬倭級示之且分遺其幕客乃

止而如松以十罪列黃黃遂中察典免仲纓相亦坐
廢黃家居講道著書從遊者甚衆嘗作立命說導人
改過遷善深有裨於世教初黃爲張居正客居正議
正樂依古法造密室三重又依蔡氏多截管以候氣
不應使黃視之曰候氣之室宜擇閒曠地今瓦礫叢
積則地氣不至一不合也外室之牆宜入地三尺二
重木室入地一尺六寸三重木室入地七寸六分今
皆不然僅可固地上之氣而不可固地中之氣二不
合也室三重各啓門爲門之位外之以子中之以午

內復以子所以反覆而固氣也今皆面午三不合也
聲氣之元寄之象數必有自然之理今所截衆管大
小不倫四不合也天之午常偏於丙二分有半今日
圭所測是也地之午常偏於午二分有半冬至候黃
鐘之管宜埋壬子之中位一而已豈可多截管乎五
不合也居正如黃言擇地天壇之南隅候之飛灰果
應居正大喜欲屬以正樂之事黃請先改曆法語不
合遂謝去黃嘗受曆於長洲陳瓌其法本回回曆而
以監法會通之更定歷元糾正五緯號爲詳密有歷

法新書行於世黃卒後東事平錄其勞贈尚寶司少
卿子儼字若思亦有文名天啓五年進士授高要知
縣未幾卒

吳默

吳默字因之兄之勇以經學名諸生間默獨好靜悟
讀書古寺每循几夜行明發復危坐嘗受學於王龍
谿先生畿文遂大進萬曆二十年會試第一授兵部
主事以憂去二十七年補禮部累進郎中三十一年
遷尚寶司丞又五年進少卿舊制符卿班在詞臣前

已漸失其初默毅然建議復之詞臣或以爲非默曰
雖違衆禮也貽書往復數四卒不屈因目爲吳鐵漢
改通政司叅議歷左通政四十二年擢太僕寺卿天
啓初以病免默性伉直數忤當事意立朝最淺然時
論高之每會推必首及云初吳江知縣劉時俊素未
與默相識會時俊以漕卒鼓譟爲淮撫李三才所劾
默方在京師聞時俊賢爲白于河南道御史御史出
彈事示之默嘆曰爲百姓受過此令所以賢也復爲
訟言於朝吏部尚書孫瑋竟用默議奪時俊奉二月

而已然默卒不令時俊知也李三才素以梟雄任數
自附東林默一見卽上疏首發其奸人以爲過後三
才以貪敗乃服其先見晚徙家吳門遇民間利病多
所建白上官知其無私每敬聽焉故事秋糧有南北
兌南軍尤黠悍往往南浮而北縮默請爲例十分之
中南弓一分五釐六毫勒石通行值歲饑首倡減價
官糶里人德之然默廉而傷刻持論不能容人之短
舊輔臣申文定公素寬厚子姓多驕縱與默比隣畏
其譏議遂相戒救不敢爲非默所獎拔如文公震孟

姚公希孟皆有人倫之鑒相與激濁揚清吳中士大
夫皆嚴憚之邑先賢徐公師曾孫公從龍杜公偉宜
祀學宮以子孫貧憲檄久不下默召主案吏叱曰爾
力能持憲使久曠祀典不能持乃公呼左右杖之吏
大驚謝去檄果下崇禎中卒年八十七

沈瓚

沈瓚字孝通一字子勺漢會孫也兄璟見文學傳瓚
少沈晦父兄皆以爲不慧年十三爲文思理秀茂兄
璟驚喜擊節由是知名萬曆十四年舉進士授南京

刑部主事進郎中斷獄務從平恕出爲江西按察僉事居二年乞身歸年僅三十七耳性耿介未嘗以竿牘入公府有年家子爲家奴所陷坐重辟瓚知其枉爲白之縣時知縣劉時俊清嚴絕請託素敬瓚爲立出之且露封馳荅曰使百姓聞吾過其見重如此三十六年大水條議蠲賑瓚力爲多家居十八年撫按交章薦起補廣東僉事甫入境疾作遂卒瓚孝友周慎人無賢愚禮接如一治家有法自奉儉甚卽宴客取不廢禮而止然能周人之急立義莊贍其族人事

兄璟如父璟沒衰絰爲位哭之極哀庶叔佐坐寃獄悉力營解又撫其遺孤分產之半與之卒後十年士民祀之鄉賢路人旁觀有泣下者

史玄曰始瓚兄璟通解音律居家不廢清商之樂課訓二子嘗麤疎失業瓚方壯去官自爲塾師親教子弟一門之內璟聲伎自豪歌舞接席而瓚從容問難詞旨精微如此二年篇章滿家其質行如此

沈琦 弟琬珣

沈琦字仲玉漢曾孫少孤卽有成人之度訓二弟琬

珣肅然如嚴師萬曆二十三年與琬同舉進士後十年珣復繼之時以爲榮琦初授淄川知縣稅監方恣橫守令觸之立碎琦將至先白上官曰彼來琦必不令得志請以身當之又宣言於吏士曰母老身病方借此求歸耳稅監聞之逡巡不敢入境民有訟者片言立決或笑而遣之凡二年間惟一囚坐贖後徙高陵三原其治一如淄川入覲還託病臥陰令健卒四出盡縛稅監用事諸叅隨置之法皆駭伏不敢動以禮部主事徵入尋卒琦長於簡札尤工案牘在官不

以掌記自隨人服其才三原淄川竝祀之學宮

琬字季玉初爲鳳陽府教授轉南京國子學正久之始遷南京刑部主事歷郎中出知東昌府爲政清簡擢山東按察副使萬曆四十三年山東旱蝗大饑巨盜劉好問等聚衆爲亂僚屬畏禍各託故致事琬兼數篆發廩賑給禽盜魁斬之招集流移置常平倉立義塚次年麥大熟乃乞致仕歸琬好禪理少時欲爲僧兄琦禁之乃止每之官必輿櫬自隨布袍蔬食卽奉金亦貯庫不入署舍家旣貧官刑部時值吳中大

稷諸子皆緣岸采蕪菁煮食自給平生不交公府神
宗升遐始自山中至縣庭哭臨百姓聚觀以爲古人
珣字幼玉初授中書選監察御史巡按貴州轉福建
叅政三遷至山東左布政尋擢副都御史巡撫山東
議增兵設防及戢劉興治亂軍具有方略俄被劾免
卒珣有藻思善清談而內行甚修世稱三鳳史玄曰
琬神理高潔鳳舉鸞騫瓚慈和汎愛冬日之日兄弟
竝爲令名所宗也

孫養正

本閩書

孫養正字聖功萬曆三十二年進士授興化府推官
精聽斷訊獄得情嘗設善惡二籍朔望令保甲條報
民間事備書其上亡得謾語異時有告言者取籍視
之具知其人本末攝莆田事時詔蠲是年賦額十之
一吏具牒槩徵叱曰壅天子德意令百姓困誅求爾
輩罪足贖耶竟如詔書亡何卒官人咸惜焉

潘子曰養正之行誼他未有所聞也而其政蹟見於
閩書者已章章如是夫士居鄉如女服官如婦苟所
婦之家以爲賢斯其家亦從而賢之矣余於邑中諸

先賢頗采方書官志以補鄉評之所不及皆此意也
於養正乎何疑焉

陳良模

陳良模字範卿萬曆十年舉於鄉授涪州知州徙巴
州有循良聲轉慶王左長史遂歸性仁恕在涪州值
楊應龍反遠近震恐良模輯寧彌縫州用不擾州有
石梁亘江中百餘尺相傳水中二石魚見則爲祥良
模至石魚自出人謂惠政所感在巴州嘗春月郊行
以民方飼蠶惡鼓聲乃潛行去鼓吹戒吏卒毋得入

民家雅好吟咏旣歸自謂獲有田園之樂益涉獵書
記鄉里皆貴其名行

趙士諤

從子廕

趙士諤字蹇卿寬之從孫萬曆二十九年舉進士授
會稽知縣政務清約有以卷軸爲壽者命藏庫中明
年復進則出而懸之從此遂絕首捐奉浚淤浦數十
里溉田萬餘畝邑人名曰趙公浦奸民妄言富盛永
昌有礦金稅監將采之士諤以宋室諸陵所在力持
不可乃已後民思其德立祠祀之縣多豪猾士諤悉

繩以法曰令或不如意則改一教職去耳將奈令何
繇是人皆斂手不敢犯士諤初至會稽四年之中辰
出酉入強力不怠四年之後出卽旋入或竟日不出
邑中號爲無事凡八年始入爲職方司主事久之以
薦調吏部考功司改文選累進郎中萬曆四十五年
主京察上疏言論人不貴刻而貴真用法不難嚴而
難當服官以操守職業爲衡兩者有議必黜若舍是
而南北東西橫置於胸中虛公旣失蕩平何期尚書
鄭繼之濬以爲然是時黨議紛起臺省橫甚士諤曲

意調停所保全者甚衆嘗嘆曰昔爲外吏行止得自
裁迨居銓司百不能如意但屹然中立耳遷太僕寺
少卿會遼東用兵戶部議折俵馬借庫金以佐餉士
諤爭之以爲折則馬空借則帑空乃止明年擢僉都
御史巡撫宣府宣府額兵八萬素多虛冒而是時急
徵兵援遼宣府獨倍於他鎮士諤三上章力持之未
報會總兵劉孔胤老耄憚行嗾營兵譁於軍門士諤
乃宣所上章諭以朝廷威德斬其渠以徇尋引疾歸
臨行猶上言張家口爲宣鎮咽喉非重兵戍之不可

其後喜峰失事寇入張家口宣府連歲告急人始服其先見士諤內行修潔旣罷官歸日課子孫讀書蕭然如諸生時不輕謁有司惟邑中大利弊如賑荒均役諸議皆其所建白作詩文澹遠真率如其爲人從子廕

廕字任卿有才武而暴悍以武舉爲金山水營把總尋掌寶山營事被劾革職崇禎九年流賊犯安慶巡撫張國維拔爲守備屯太湖十年二月賊東下廕提兵禦之至雞飛灘遇賊三百餘騎擊却之斬二十餘

級追奔抵通湖賊以百騎來山前挑戰廕據山爲營而遣千總楊國鎮等以銳卒二百赴之射殺賊渠數人而賊潛從山後以千騎襲廕營廕力拒之手刃十餘賊以衆寡不敵被執脅降不屈遂遇害部下李池等皆格鬪死事聞贈指揮同知子孫世襲總旗仍令太湖建祠祀之廕少孤貧家世業儒廕獨戲取邨中羊學騎剡竹爲弩矢射籬邊燕雀以爲笑樂人咸目爲狂及年四十仗節死義聞者莫不壯之

潘子曰故老皆言趙公不爲赫赫之名而有皜皜之

節其人蓋寬然長者也公冢孫瀚有文行隱居教授與余善嘗從問丁巳京察事云時主計者爲尚書鄭繼之老矣吏科徐紹吉河南道韓浚皆輕險銳意以鉏擊東林爲風采公自田間來一主虛公多所救正如孫公慎行等皆賴其力得全而於王之案事尤多苦心世莫知也王之案者以持挺擊獄忤神宗意欲罪之而患無名欲以計典錮之紹吉等覘知上指以語公公謝曰以銓司黜陟之典爲奉行中旨之具是亂首也不可而之案素無行自揣必不免私詣公跪

請之公正色叱曰君自號正人奈何惶怖失度若此獨不愧於心乎之案自是淡噤之矣然考察疏卒不及之案疏上上令中官讀之無之案名遂畱中署都察院李誌聞之乃於拾遺疏列之案貪酷故事拾遺止四品以上而之案以主事預亦僅見也拾遺疏旣得旨下部明日考察疏亦下公當具覆乃引浮躁例坐降調上特批革之案職仍奪誥命皆非公意也公所謂居銓司百不能如意者蓋不特一事而此尤關職守之大者故詳著之

周道登

周道登字文岸少有器識儀觀甚偉萬曆二十六年成進士改庶吉士授編修性恬退畱心典故以獨立行意故十年不遷官久之始爲國子司業少詹事泰昌初以禮部侍郎攝部事時連遭大喪典禮殷煩道登拮据劬勩皆有條理後請告適魏忠賢用事遂削籍家居思陵卽位首重閣臣之選上自祝天取會推諸臣姓名置金瓶中卜之得錢龍錫等六人道登與焉乃卽家召爲東閣大學士旣至首陳三事曰守祖

制曰秉虚心曰責實效上皆嘉納尋以奢酋平推恩輔臣加道登太子太保進文淵閣居官廉慎自將以不善附和爲黨人所嫉會選庶吉士道登所取朱統鈔本南昌宗室御史任贊化等交章論其違制道登坐罷然統鈔實有文行事竟得白道登事兄如父門庭肅穆篤於親故不妄交接遇水旱有司祈禱道登亦避居郊墅爲民請命然恩怨太明論者或少其量焉無子以兄子振孫爲後

潘子曰公爲相僅踰年卽致事去其入告動以法祖

松陵文獻 卷六
爲言而統飾之選庶常反以違制見譏何哉夫祖宗朝未嘗有宗人入仕之禁而有司奉行過爲拘制自四民之途旣開宗室有才藝者始蒸蒸嚮用而獨不使入中秘備顧問何示人以不廣也若謂同姓不可當國則唐李適之宋趙汝愚伊何人哉然則公之得罪正以其守法非違制也公於先大父爲外兄弟故得備聞其遺事要之救時之略或非所長而清嚴懃直以視古之大臣亦無愧矣

松陵文獻

獻集卷七

人物志七

邑人潘檉章力田撰

明

周宗建

周宗建字季侯恭肅公用曾孫萬曆四十一年進士授武康知縣兼攝德清三年調仁和遇事明決剴斷如流他邑有疑獄爭請詣宗建一訊卽白時稱神明天啓元年以卓異擢監察御史時保母客氏與魏忠

賢居中弄權外庭猶未覺也宗建首上章請止客氏入宮明年因雨雹之異極陳忠賢奸狀章三上忠賢恚恨至欲削髮爲僧以激上怒賴閣臣葉向高等申救僅坐奪奉四年上欲遣太監劉朝視關門軍如古采訪使宗建力言三不可九害遂得已巡視光祿所裁省以數萬計會聞父喪歸而都御史楊漣左光斗等相繼劾忠賢罪皆引宗建疏語爲証漣等旣下獄死忠賢恨宗建刺骨其黨曹欽程舊令吳江素不快於宗建乃誣以在仁和時贓罪并連及同邑吳煥坐

削籍聽勘忠賢又僞爲稅監李實疏糾撫臣周起元等竄入宗建名矯詔逮下獄拷掠備至竟不勝酷烈而死崇禎初贈太僕寺卿謚忠毅宗建家居時值邑中大水爲請折漕米一年當事者采其言上聞竟報可邑人德之所著有詩文奏疏若干卷

吳煥

吳煥字文叔洪之曾孫萬曆四十四年進士授海寧知縣三年調仁和以憂歸天啓二年補內黃考最會曹欽程誣奏周宗建罪以煥其同鄉又相代爲仁和

松陰文獻 卷一
令疑有奸私事下所司按之無跡而宗建復坐周起元逮下獄死崇禎元年召煥爲監察御史首發太監崔文昇罪惡并及欽程上怒繫文昇於馬房其黨伏宮門大哭聲震御座命執首事二人及文昇各杖之百發孝陵淨軍而煥疏畱中已補牘請乃下吏部議欽程罪命自今有畱中者皆補牘取上裁時詔燬三朝要典詞臣孫之獬涕泣固爭以爲不可煥抗章駁正之獬竟坐廢尋出按陝西時秦中大饑邊軍多去爲賊攻掠西寧漢中勢漸長有司畏罪不以狀聞煥

連疏糾游擊龔其勝等主撫縱賊又請卹戰死千總王佐百戶劉爵皆報可踰年改督遼餉而流賊益橫諸將不能制往往旋撫旋叛皆如煥所料五年以病歸久之起爲湖廣按察副使不赴卒

潘有功

潘有功字臣伯天啓二年進士授中書舍人崇禎三年選爲兵部車駕司主事五年遷職方司員外明年晉郎中素習武事及在樞曹以練達稱擢爲陝西叅議至則攝關內守道事七年八月流賊犯渭南有功

奮曰渭南富庶且當會城之衝萬一不守全秦動搖矣遂單騎馳入城衆以賊新盛請固守有功曰不挫其銳何守之能固聞賊勁惟塘馬近在二十里外而老營遙爲聲勢若殲其塘馬則老營不戰走矣下令募食夜四鼓戎服乘馬而出軍民遮道阻之不可乃躬巡諸營勉慰之皆踊躍直前襲賊斬百餘級比曉賊大奔潰無何徙靖鹵道以賊屯塞邠州乃南趨鳳翔而賊復阻汧隴月餘聞北道稍通復改從北會叅將浦國忠之官蘆塘卽與俱行十月抵涇州城新破

無人野宿郊外會賊騎大至登山自守凡一晝夜衆皆饑困已乃結隊前行遇賊伏衆驚潰有功墮馬傷脅厓得至官會冬防方急羽書旁午力疾視事八年二月始解嚴有功竟以勞瘁卒官爲人曠達不事威儀詩文皆有清裁少時夢至一城郭榜曰金城因以自號及官隴右行部抵靖鹵衛爲古金城地果符所夢未幾而終

葉紹袁

葉紹袁字仲韶父重第萬曆十四年進士仕至貴州

僉事紹袁少有藻思工詩賦天啓五年舉進士七年
選爲南京武學教授遷國子監助教明年擢虞衡司
主事以不耐吏職又好觸忤中貴悒悒不自得久之
遂請告歸家素饒財及宦不達復不能治生產家顧
益落杜門讀書罕謁長吏間以公事往謁持論侃侃
小不合意卽拂衣去長吏知其賢亦加敬焉妻沈宜
修字宛君山東副使琬女工詩五子三女竝有文藻
一門之中更相唱和以此自娛遂不復出乙酉後棄
家入山混跡緇流感憤時事發爲詩歌有三閭五柳

之遺風自號粟菴蓋言未免食粟以志愧也嘗輯一
時死節諸臣爲書未就而卒長子世佺字雲期能守
遺訓絕意進取然卒與諸弟竝窮困而死聞者傷之
列朝詩集曰仲韶少而韶令有衛洗馬潘散騎之目
宛君十六來歸璫枝玉樹交相映帶吳中人艷稱之
生三女長曰紈紈次曰蕙綢幼曰小鸞蘭心蕙質皆
天人也仲韶偃蹇仕宦跌宕文史宛君與三女相與
題花咏草鏤月裁雲中庭之詠不遜謝家嬌女之篇
有逾左氏於是諸姑伯姊後先姊姒靡不屏刀尺而

事篇章棄組紆而工子墨松陵之上汾湖之濱閨房
之秀代興彤管之貽交作矣小鸞年十七字崑山張
氏將行而卒未幾統統以哭妹來歸亦死宛君情傷
心死幽憂憔悴又三載而卒仲韶於是集宛君之詩
曰鸞吹統統之詩曰愁言小鸞之詩曰返生香及哀
挽傷悼之什都爲一集而蕙綢鴛鴦夢雜劇傷姊妹
而作者亦附見焉總曰午夢堂十集盛行於世

朱天麟

朱天麟字游初初冒沈姓名天英後更今名少孤貧

托身黃冠有老儒陸生者聚徒講授天麟竊從戶外
聽之輒能記誦如素習者其徒以白生生召而試之
曰此異材也遂錄爲弟子天麟感奮力學遂以文行
知名於時已徙崑山崇禎元年成進士授饒州推官
久之不調十一年徵至京當考館職爲吏部所抑補
兵部武選司主事會上于經筵從容語及人才詞臣
黃景昉等因稱天麟學問醇明可惜上爲切責尚書
田唯嘉等唯嘉尋坐贓免而上親御中左門策問時
事天麟等五人俱改翰林編修蓋異數也南都之變

間關至閩遷翰林學士閩事敗又赴梧州歷官東閣
大學士有強藩據地求封王天麟議以祖制無異姓
封王之令格其請不下強藩擁兵要挾爲罷天麟以
謝焉未幾卒

盛王贊

盛王贊字子裁宋文肅公度後寅八世孫曾祖應陽
嚴州太守有清節王贊少貧苦依外家陽城張氏後
徙郡城崇禎十年成進士授蘭谿知縣親友餞之胥
江諸書記在坐王贊酌卮酒於江曰與諸公盟自今

凡有利於民無利於官者不可不爲有利於官無利
於民者慎不可爲及到縣一切公費悉蠲之湯溪靛
寇竊發衆號萬人焚掠山澤蘭民震恐王贊單車按
行境上左右請設兵衛不可乃率里老講明鄉約具
陳古今忠義之事詞旨慷慨聞者心動因使人持檄
賊中諭以恩信爭縛首惡以獻事遂定蘭民素健訟
王贊平心聽斷摘伏如神有甲牛爲乙所盜兩家俱
有母牛互爭不決乃命置二母牛於庭東西而取子
牛居中掠之乙牛啗草自如甲牛含淚匍伏有哀楚

狀遂得其實遠近神之邑當往來孔道舟車供億民不堪命乃捐俸僱百人築室三十區居之日給工費不以煩民居三年當入覲有贖鍰四百金書記請爲行貲王贊曰非吾志也邑號衝疲陂塘圯廢其以是葺之急召吏受事兩月而竣扁舟就道惟衣囊書篋兩肩而已時詔入覲諸臣得直陳利害王贊上言南糧諸事俱報可尋命復任會歲大饑臺司下令遏糴富民緣以牟利王贊獨嚴私販出境之禁有無通易及郊而止四方米價踊貴而蘭邑獨平民賴以濟巡

按王範行部訪逮姦蠹王贊獨無所舉屢檄不應範怒監司素不快王贊者從而搆之範遂劾其偏執乖張當調去士民間之巷哭罷市至擁塞城門不得行王贊乃微服潛歸士民號呼奔走數百里爭致錢布爲助王贊笑而却之廷臣倪元璐范景文鄭三俊等交章以薦上一日御講筵顧輔臣云人才難得愛惜宜先盛王贊何如人哉對曰潔已愛民上云何故被劾對曰不善上官上曰此強項吏也越數日復問輔臣有一賢令未用忘其名輔臣莫能對上乃手出一

摺具載劾疏始末曰盛王贊也此人宜在銓部於是京師翕然咸稱聖主知人命未下而北都變作南都再造戎政尚書張國維東陽人首舉王贊治行時東陽新遭許都之亂都已禽而其黨懼罪多負固劫掠故國維以爲請遂補東陽東陽人喜曰盛公來吾屬無事矣過蘭谿蘭谿民爭挽其輿入城曰今日還我父母東陽士民傾國來迎將及境亂民之黨夾立道旁曰皇帝選賢令我願一望見顏色東陽戍卒悉衆來援王贊曰是不過欲識新令爾無他虞也麾蓋

直出皆羅拜而去至縣首驗獄囚凡事連許都者悉諭遣之其黨相謂曰明公不俘此爲功而反縱之敢不解甲歸命甫七日以母喪去官邑民援軍中奪情例詣闕請畱不得蘭谿人立祠祀之歲以生日爲盛公會民間吉凶事必告而禱焉吳中人有經其地者必問訊盛公安否或至泣下乙酉五月聞南都破閉閤自縊爲人解救遂削髮爲僧避居陽城湖濱課邨童自給日無再食嘗采茨蒿之屬雜以麻麥如僧家所謂瓊瑤粥者家人或有難色王贊先自飽食衣每

百結輒自引線聯絡負日於簷榭然自得時當道者
多其故舊嘗遺書通問王贊輒婉辭謝之亦不復荅
壬辰六月卒年六十有五
汝可起

汝可起字君喜崇禎壬午以貢士廷試入都時東事
方急天子臨軒試選人騎射可起三發三中的上善
之未及用循資授常州府訓導南歸至河間之故城
縣縣已被兵可起止寓舍遊騎突入戶見可起危坐
不動曰汝官人耶當降我降即不死可起叱之曰汝

知有不畏死官人耶遂被刃罵不絕口探血書壁未
成字而死

吳易

祖邦楨

吳易字日生曾祖山自有傳祖邦楨字子寧嘉靖三
十二年進士除刑部主事進郎中擢湖廣按察使時
荆襄大水潰隄隄亘七百里邦楨出贖鍰補之如故
龍潭蠻黃中據施州爲梗楚蜀間咸受其害又土酋
輩宁恃險遠焚掠邦楨一以撫一以討功尤著忌者
沒之僅賞金綺遷甘肅行太僕卿尋改陝西致仕卒

易少有才名負氣矜奇兼好兵法通任俠雅不欲以經生自見間爲詩文傳誦士林非其好也崇禎十六年成進士會北都失守易感憤作恢復議四篇洞晰形勢史公可法督師淮揚薦爲兵部職方司主事監紀軍前馳驅戎伍甚有勞績乙酉夏督餉吳中聞南都之變與同邑孫兆奎沈自炳等號召舟師屯湖蕩間結柵自固然兵皆烏合實不堪戰被襲夜潰兆奎被執易僅以身免父承緒妻沈氏竝遇害時浙東兵起易乃收集潰散遙爲聲援遂擢兵部侍郎尋有梅

墩之捷晉兵部尚書封長興伯未幾江上兵亦潰易單舸走嘉善被獲送之杭城見殺於草橋門年三十五亡子妾阿香故妓也同時被掠以死自守諸帥皆敬禮之後得釋歸老於柳胥故里焉

孫兆奎

孫兆奎字君昌從龍曾孫也祖履恒習兵家言兆奎能世其學崇禎九年與吳易同舉於鄉相得甚歡已遂同起兵長白蕩未幾兵潰被執至金陵見大帥挺立不屈大帥故降臣也兆奎以大義訶責之其人羞

愧不能荅遂殺之臨刑賦詩見志顏色不變發潛錄
曰兩君舉事號召之遠聯屬之衆則孫不如吳臨事
之慎赴義之烈則吳不如孫吳在軍中每置酒高會
孫勸其節飲且以謹斥堠爲戒吳不能用竟坐是敗
是時邑人沈自炳吳鑑徐鑛呂雲孚沈約朱旦陳宗
道之流仗義而死者甚衆不可勝紀也

王景亮

王景亮字武侯初名佩字仙聲家故微父嘗托身吳
氏及貴未嘗失禮人以此多之景亮有至性刻苦嚮

學崇禎十六年成進士弘光中以中書舍人主雲南
試會亂不進遂歸閩中擢監軍御史極言時事動中
機宜甚見褒美旋加太僕卿巡按金衢兼督學政初
與永豐伯張鵬翼不協尋各釋嫌期報國人兩賢之
丙戌八月城破被殺鵬翼亦死之

趙庾

附顧祖奎張起

趙庾字渙之崇禎十六年進士知甌寧縣有惠政丙
戌六月閩中初舉鄉試庾爲同考官遷行營禮部儀
制司主事改文選司主事赴延津忽患足痺遂請告

寓高陽山中建寧破庾卽爲僧往來吳越間訪名師
受戒律雖家人罕見其面最後爲靈巖僧繼起嗣法
弟子居天台國清寺辛卯冬來吳江至穆溪遇風舟
覆而死爲人恬淡貞粹確然不欺其志者也又有顧
祖奎字玄度天啓元年舉於鄉後知連城縣與庾同
時爲戶部郎出知南寧府祝髮於肇慶之白雲寺而
卒張起字將子崇禎三年舉於鄉十六年授廣州府
推官甲申後改授韶州又改欽州丙戌冬粵東破起
先令妻妾投繯死將從之爲所親抱持不得死後歸

肇慶擢戶科給事中粵東再破從走南寧不知所終
吳有涯

吳有涯字茂申幼穎異能文天啓七年舉於鄉數上
不第與同郡張溥楊廷樞輩倡爲復社以古學相劘
切四方人士翕然宗之遇邑中有大利弊必慷慨白
當事多所補救巡撫張國維尤重之崇禎中署金壇
教諭遷平陽知縣首立十禁又請折海運止預征政
聲大著南都破避地樂清遂入閩中召對自晡至夜
侃侃數千言有真御史之褒擢廣西道御史巡按浙

東在閩三月前後四十七疏皆軍國急務以道梗駐
處州浙東兵潰削髮為僧歸隱鄧尉山久之返故里
當事請一見不可幽憂發病不言不出若干年卒

松陵文獻

獻集卷八

人物志八

邑人潘樾章力田撰

儒林

宋

王蘋

附從子誼從孫楸

王蘋字信伯其先福清人父仲舉字聖俞剛介厲學
不徇時好徙家邑之震澤鎮卒贈奉議郎蘋出為世
父伯起後伯起字聖時受經於王安石學文於曾鞏

有詩曰唱道野集卒贈右宣教郎二程在雒伯起遣
蘋往從之遂爲程門高第通春秋楊時嘗言後來師
門成就者唯蘋耳三舍法行遂不就舉蘋平居恂恂
儒者及語當世之務民俗利病皆如素習然不徼名
當世世罕知之紹興初高宗幸平江知府孫佑薦其
學行以布衣召見當戎馬間陳說數百言補右迪功
郎賜進士出身除正字兼史館校勘受詔條具賊退
利害蘋奏治本三事曰正心誠意曰辨君子小人曰
消朋黨上謂輔臣曰蘋起草茅而進止議論皆如老

成儒者能通世務乃爲有用耳預修神宗實錄優詔
獎諭胡安國力薦之謂其學有師承識通時務使司
獻納必有補益遷著作佐郎通判常州主管台州崇
道觀不悅於秦檜會從子誼呂作文刺檜貶象州蘋
亦連坐奪官久之復予祠引年致仕官至左朝奉郎
卒年七十二蘋識慮精微論議平易隕然若與世忘
旣老作論語集解未成合集文集爲四卷曾逮嘗問親
師友之道曰師不專在授受友不專在講習於精神
氣貌間自有相激發處是善親師友者人目爲名言

嘉熙元年知府王遂祠之學宮寶佑初里人沈義甫
立像震澤鄉校以門人陳長方楊邦弼配號曰三賢
子大本朝請郎浙江安撫叅議大中儒林郎竝以學
行世其家從子誼從孫楸備著平長簡然法與母竝
誼字正仲徐志作仲玉誤一字漢臣師事楊邦弼以學鳴於
時秦檜當國忌天下能者誼因發憤擬爲罷相對曰
刺之爲其僕所告檜怒貶象州十年乃歸遂不復仕
著春秋類書

楸字勉夫恬憺寡欲少孤力學母沒蔬食布衣絕意
進取題所居曰定分齋好著書有野客叢書三十卷
巢睫稿五十卷晚年嬰廢疾卒子德文字周卿克世
其學嘗刻叢書成焚之墓見者無不感涕官止承節
郎孫教字行父著雲嶠類要紀事極該博史玄曰宋
郭紹彭志墓稱楸居笠澤楸爲吳江人無疑今刻叢
書乃冠以長洲謬也

陳長方

陳長方字齊之其先長樂人父侁字復之舉進士與
魏了翁交善了翁謫廣州侁以書賀由此得罪嘗從

游定夫學得治身養心行已接物之要娶吳人林旦
女生長方長方少依外家因從王蘋遊居震澤鎮紹
興中舉進士爲江陰軍教授尋歸徙家步里閉戶著
書有步里客談春秋禮記尚書傳漢唐論諸書學者
稱爲唯室先生弟少方字同之亦端介不羣孝宗朝
爲東宮講官時號二陳

楊邦弼

楊邦弼字良佐其先浦城人文公億四世孫也來吳
從王蘋學遂居震澤探極理趣發爲詞章紹興十二

年舉進士第三會行在初建太學選爲博士踰年通
判信州遷大理卿改湖南漕不務鉤致甚得大體擢
秘書丞著作佐郎再遷禮部郎以起居舍人使金還
進起居郎中書舍人卒孫紹雲寶慶三年以薦補官
終禮部侍郎

沈義甫

沈義甫字伯時嘉定中領鄉薦爲南康軍白鹿洞書
院山長舉行朱子學規時稱良師久之致仕歸震澤
建義塾講學以淑後進又建明教堂以祀三賢隱然

自任後傳之意學者稱爲時齋先生卒年七十八著
時齋集遺世頌行世今列鄉賢祠

明

徐師曾

徐師曾字伯魯沈澹好學弱冠抗顏爲人師嘉靖二
十六年舉禮部以父母年高不對策而歸父歿後始
成進士選庶吉士轉兵科給事中復以母喪歸起補
吏科所建白多切時務奉使周藩晉左給事中是時
肅皇帝春秋高嚴嵩父子用事言路多循嘿失職師

曾慨然嘆曰可以止矣會疾作遂請告不起闕書舍
南湖上屹屹講誦如諸生時萬曆初以薦起禮科固
辭晚年覃思著述皆翼經而證史頗及時務亦喜作
詩工取達意所著有周易演義禮記集註正蒙章句
世統紀年湖上集文體明辨大明文鈔宦學見聞吳
江縣志小學史斷經絡全書六科仕籍凡數百卷卒
年六十四史玄曰往時禮記列於五經士子但用陳
澔集說曾以爲未盡善始鳩集羣儒潛心講諷積數
十年乃效朱子成規撰爲集註功加於澔其學至今

通行之先是莫旦史鑑陳理皆爲縣志至嘉靖中世及事邇文尤繁猥曾以爲不足經遠重作吳江志綜討舊章號爲良史王志堅曰弇州名賢贊謂徐公以父母老不能直諫故歸而不知公之父嫡母生母皆已前卒今據墓表正之

王世貞贊像曰吾聞之有言責者不得其言則去去以全志亦以全厥身而永終譽又聞之人有不爲也而後可以有爲嗟嗟先生乃竟不爲卒以全歸耶

張德載

孫世偉

張德載名犯宣宗御諱以字行父銓見文學傳德載性至孝嘉靖十九年舉於鄉例得坊金一日散宗黨略盡父銓卒南安德載千里奔喪哭踊幾絕服除當就試忽念大母陳氏年高輟棹不赴亡何大母卒尋以避倭奉母入郡旣再試不第

分省人物考云亡何大母死其父亦死是

銓卒於陳氏之後也大謬無據

遂屏冠服爲野人裝題其室曰愛日朝夕不離母左右自就養而外卽斂膝坐小樓中不爐不扇不寢不飲酒食肉謝絕賓客守令造之或不

得見亦不報謝也於書無所不窺而尤邃於經術多

所箋纂晚益究心主敬之學多所自得修撰羅洪先
倡道江右聞其篤志思相質問然知德載養母不肯
卽來特遣門人遠來就正咸嘆服去所著有孝經附
註讀書疑獨鑒廣願諸書隆慶元年詔求山林遺逸
撫按交薦皆不應兵備蔡國熙嘗單車造請退而嘆
曰不圖今世有如此人知縣李遷梧有清名厭苦簿
書嘗獨嘆郡中有德載等數人可結繩治其爲長吏
敬服如此歲大祲有米數百斛悉以賑饑屬軍興族
人苦重役德載曰吾何忍獨以例免而煩族之老弱

爲請於官毀家產代之忽一日預刻死期至期端坐
而卒年五十九學者私謚曰靖孝先生崇禎十年御
史祁彪佳表其德行與歸子慕朱陛宣俱贈翰林待
詔立祠學宮德載陛宣皆吳江人時以爲盛事孫世
偉

世偉字異度七歲喪母朝夕上食號慟同舍生聞者
皆爲流涕及長文名籍甚萬曆四十年舉順天鄉試
出新城王象春之門初黨議之起世偉扼腕樹頰多
所題覈裁量至是忌象春者并指摘及之坐停三舉

屏廢以老然世偉所交游皆當世賢達以名行相砥礪郡有大利病措紳相顧囁嚅必自世偉發之卜居淶水園閉門誦讀清談竟日樵蘇不爨卒年七十四學者私謚曰孝節先生

杜偉 本吳默撰傳叅耆舊傳諸書

杜偉初名嵩字道升少育沈給事漢家冒其姓嘉靖三十一年舉於鄉沈幾頴悟窺極理奧修撰羅洪先家居講學聞偉名乃延爲子弟師偉學務主靜而尚躬行動止皆有法度邑中有大利害必身先白於上

官氣平而詞達無不見采納自以受沈氏恩厚自漢沒爲訓督諸孫經紀其家至漢孫位成進士偉曰沈不憂門戶矣乃復杜姓後位死遭家難偉慨然以存孤自任卒得全已而累舉不第謁選爲南陽府推官專務以德化民擢工部主事權荊州關寬恤諸商稅課或不及額遂引疾歸將發指舟中二木笥曰此來時所無必荊州物也命沈之江會言者劾偉不赴部考覈爲非制下工部覆具言荊廠竹木自四川建昌諸路浮江而下而彼地連歲用兵兼之采辦大木商

賈少至以故稅額減於前然時勢不同實無賊私可
以指摘請特免考覈上知偉賢遂許之嘗道過鄱陽
湖大盜猝至偉讀書自若既而知爲靜臺先生也羅
拜而去有嫠婦夜奔爲正坐諭以大義婦慚悔泣而
去其德化如此靜臺偉別號也所著有順性學聚二
錄正學編靜坐訣四書筆記諸書今列鄉賢祠吳默
曰偉生平無匆遽之色雖造次搶攘而神閒氣定應
之坦如蟬蛻世氛之外學不繇師傅自修自證所謂
豪傑之士非耶史玄曰是時張待詔以立敬爲宗杜

虞衡以主靜立說雖宗尚分塗皆爲儒林所重

朱陞宣

朱陞宣字德升少立名行十餘歲從父燾徙吳縣山
中萬曆四十年舉於鄉性至孝念父母老一再上公
車往返不過百日天啓五年寓京師忽心動馳歸未
幾母遽卒自是絕意進取朝夕侍父寢食調治湯藥
中單廁踰手承而進後父沒哀毀成疾竟卒少與周
忠介公順昌同學順昌中璫禍親知皆伏匿陞宣衰
經往送之周旋甚至爲孝廉二十年妻子化其德門

庭肅穆所爲詩文皆根柢理道學者私謚孝介先生
崇禎十年贈翰林院待詔子鑑字彥兼有學行亂後
隱於黃冠以卒

潘子曰郡志稱信伯早遊程氏之門視楊時猶爲後
進而林艾軒云楊龜山之學傳之信伯意者龜山之
及門雖稍後而聞道則在前故信伯從而師之耶自
陳楊二賢而下皆羽翼伊川之教者也明代尊尚儒
術自嘉靖之季士以講學爲名高其流至於不可方
物而吾邑乃有真儒者三人焉徐伯魯之明經張敬

堂之立敬杜靜臺之主靜斯皆足以垂世立教矣嗚
呼盛哉

顧文亨

顧文亨字石父爲人貞亮和粹讀書不事章句當其
得意悲喜交集幼從兄廷植論史至漢北地王諶哭
先王廟自殺不覺號慟廷植爲之廢講弱冠補嘉興
府學諸生累試不第意泊如也家貧嗜學靡倦尤深
於易象春秋之旨旁及律歷星官無不綜究已讀邵
子皇極書耽思至忘寢食以叩其師岳公元聲元聲

日學皇極當自聲音入於是取等韻字母習之稍稍有所開悟一日夢邵子親爲指授曰全書在杭未幾遊杭果得祝泌鈐而皇極以聲起卦以卦合數之法發揮無餘蘊矣所著書有經世叅經世聲音臆解經世總圖春秋類記訂補紀事本末甲乙帳易鑑洪範疇解星江雜著諸史石言等書凡數百卷皆根極理數兼括古今晚年避亂隱於秀水之鄞陵邨作綱目紀事會戊戌春疾急猶強起刪訂屬草未半而沒年七十有四子宗瑋字連叔少穎異覃精著述凡圖緯

聲音之學文亨所未悟者宗瑋輒砉然先奏刀焉所著有左氏事類年表春秋通例稽疑叅同提要發明諸書先文亨卒

潘子曰石父先生余初未識面乙未冬邂逅論心恨相見晚因質以皇極經世起例先生曰讀異書當得異人子真其人也吾不惜傾囊相授因約明春下帷僧舍出書共訂竟不果來後三年而先生沒於禾余聞而哭之野念其遺書不知當如何散佚也展轉訪求得其孫延曦持所爲行狀及遺書見示回翔披覽

如對顏色噫先生為不亡矣延曦有志節能世其家
學云

孝義

宋

陸十七

陸十七震澤鎮人父疾篤剗心作糜以進疾遂愈後

父卒廬墓不去母卒亦如之與幼弟終身共爨備極

友愛寶祐二年郡守趙汝歷為建旌孝坊又嘉熙中

郡守吳潛建純孝坊以旌湯家浜里人刺心療母疾

者逸其名此姑蘇志原文也徐志刪湯家浜三字訛
人作八直以里八為姓名大誤

元

華翥

華翥字伯翔好古力學有聲士林性至孝母疾禱北辰而愈及母沒翥猶持律甚嚴吳復撰華孝子誠感序曰至正辛丑夏四月丁未朔與客抵僧宗舍宗爲黍飯之將殺鷄翥以齋禁辭弗聽刀忽墮地折爲三乃止衆駭其事咸賦詩記之徐師曾曰翥事近怪誕儒者所不道也然吳復非妄人又日月可考信理或有之存其事以俟知者

奚士龍

出楊循吉紀畧

奚士龍吳江州人至正二十四年見吳學鼎新慕義割私田九十畝有奇歸學以供餼廩

陳和甫

陳和甫失其名吳驥蒙菴集曰予觀松陵陳氏所藏先世孝行卷爲之感嘆不已蓋其先和甫處士以孝聞於鄉在元延祐中慈母患風疾不能言走四方求醫莫治遂割股爲糜以奉之復禱於神精誠所感疾遂愈父客燕京疾篤處士馳往籲天乞以身代其卒也徒步數千里函骨歸葬薦紳之士咸嘉其孝行形

諸歌詠名聲籍籍惜無當路之援竟弗沾一命之祿以卒然自延祐丁巳以至於今彼公卿達官之貴且富非不炫耀於當時苟無忠孝以垂於後則其身名俱喪不啻始朽而燭滅矣今陳氏由和甫而下累葉相承至雲孫宗明昆季三人才行卓然能世守先業天佑善人信夫

李真

李真字允真宋秘閣侍郎衡裔孫年三十喪妻未葬真他出家偶失火焚其棺真歸號痛收骸骨葬之而

虛其右以自待終老不再娶子昱字景昭嘗輸粟百斛賑饑有司旌以冠帶辭不受人稱其世義云吳驥曰允真倜儻有爲襟懷灑落性亢直篤於行義見貧困可矜則惠粟以周之雖豪貴有過亦正言以折之心地坦夷是非無所隱嗣續繁昌享上壽以卒景昭弱冠掌糧儲能裨贊邑政事無妄爲言必當理鄉民皆信服年踰七十乃終

陳晉

陳晉字次翁元末僞吳竊據其父坐作詩謗訕論死

松陽文獻 卷八
晉請以身代父子爭死不決王者謂代父者孝代子者慈慈孝之人安肯訕上遂皆免之父尋病死既葬猶朝夕哭至失明洪武中晉妻家坐藍玉黨逮治事連及晉晉棄家遯去以存宗祀後遇赦歸孫讓亦善事親鄉里稱爲世孝

徐孝祥

徐孝祥家貧力學不求仕進嘗於廬後掘地見白金輒掩不發居三十年爲至治壬戌歲大饑乃盡發之以賑貧乏全活不可勝計其後嫁女惟荆布而已錙

銖弗取也子純夫以明經發解仕至翰林供奉承旨受封如其官卒年九十七

明

盛逮

盛逮初名棣字景華父似祖有行義洪武初逮以賢良應召賜冠帶叅大臣議事與中書叅政陳寧不合因引疾辭歸寧尋出知蘇州將以事中之乃命逮督辦通區逋賦逮傾貲貸民以償友人唐自牧負官租可二百金走告於逮逮如數與之翰林待詔李幹老

無所歸逮延之家塾既卒葬於墓側歲時祭之弟章
字景良以鹽法被捕甚急父憐其少不忍遣逮曰弟
未有子請就捕因謫戍寧夏嘗遊閩中得異人導引
法作原道詩年九十三莫旦曰景華既代弟就捕至京法司立赤白二旗於庭令
曰願爲軍者立赤旗下爲民者立白旗下景華與友
人蔣生謀就赤旗生驚曰奈累子孫何景華曰子孫
賢僱人爲軍不賢代人爲軍毋過慮也生亦從之已
而奉詔亦爲順白爲逆逆者皆斬首戶丁發戍邊遠
而景華得戍寧夏
年九十三卒於家

莫轅

莫轅字巽仲禮兄子少從張適易恒學洪武初父繫

詔獄將刑轅年十一自請代死有司奇之試加脅誘

語無異詞遂奏釋其父而繫之後轅父更爲稱冤闕

下竟瘐死而轅獲赦季父禮方有寵於上又與沈萬

三諸大族連姻時國法方嚴轅憂之每勸祖諛散其

家財兄輪不從乃謬指同姓隸洱海衛者爲己族人

皆怪之二十九年藍黨獄起祖諛與禮俱死於法餘

謫戍一家無能免者獨轅以嘗附尺籍得脫變姓名

亡命往來經營竊其祖叔遺骸按莫志云云蓋指諛與禮同死故也徐志

不詳改叔爲父且前已云歸葬之屢冒法禁幾死嘗

以腦子自隨曰脫有急則服之兄子雲霖俱幼孤無
依轅保護甚至建文元年赦歸痛念家禍却酒肉不
御者數年沈文度者萬三之曾孫也有女字陝西劉
巡簡而文度死家戍邊轅乃收養其女長而歸之鄰
有舉室死疫者獨一幼子存人以疫能相染莫敢視
又收養之家失火延及母寢轅躍入火抱母以出須
睂焦灼人至莫識其面治喪不用異教亦不泥時日
方位之吉凶凡世俗淫祀一切屏絕老而好學爲詩
文有理趣年七十七卒門人私謚曰貞孝先生子震

自有傳

徐昌伯

弟季昭

徐昌伯永樂中坐事謫戍遼東家有老母其弟季昭
請兄畱養而以身代行昌伯曰爾少年不更事豈堪
遠戍二人互爭久之母竟遣季昭行後十餘年季昭
還母兄尚無恙相見極歡鄉人稱之題其堂曰孝義
潘子曰季昭尤難也徐志獨稱昌伯者何且其母亦
賢母也不日愛少爲念而能成二人孝義之名其事
皆可書云

鈕釧

鈕釧字時勉爲人落魄不羈好儒術不事家人生產父文知溫州釧隨侍而母妻畱家居妻以疾卒所親有銜釧者說其母從俗火葬釧歸知之口不敢言而心痛其事誓不復娶亦不畜婢媵積四十年終始一節嘗爲人塾師夜有婦奔釧釧拒之明日托以他事辭去其節操如此

沈希旻

沈希旻父本中爲邑吏永樂初嘗預薦辟未仕而卒

時希旻尚幼母奚氏撫之以至成立希旻旣長與妻馮氏事母以孝聞母卒希旻命畫史寫真朝夕虔奉出告反面儼如生存吳驥其姻親也爲贊以美之比於丁蘭云

龐景華

本倪謙志

龐景華字宇春世爲吳江人父彥恭有隱德洪武中以貲徙京師遂爲上元人景華幼有至性九歲喪父卽哀毀如成人母吳氏素賢鬻簪珥市書教之景華好學不倦與婦徐氏勤力養母家遂以饒宣德三年

母邁危疾景華親嘗湯藥夜則稽顙禱於天已乃剖股作糜進之母果瘳又嘗患痢剖股如初取糞嘗之謂妻曰味苦母不死矣果然天順二年春隣人失火延及所居乃呼天曰母老矣願天畱此終餘年頃之風反火熄人以爲孝感明年有司以狀聞詔旌其門曰孝行復其家母至九十三而終景華廬墓側朝夕哭奠有盜十餘人至聞哭聲曰孝子也遂遜去有慈烏集松栢靈芝產階下士大夫多爲詩歌以美之成化中府尹王弼欲舉孝廉不果乃請爲鄉飲賓又數

年卒

陸琦

陸琦字文璧善古文兼通醫卜星命之學爲人沈敏寬厚里有劇盜鼓譟入其家見琦投杖而去曰不圖八丈在也後又至遇琦輒去終不忍犯正統九年舉於鄉尋卒

吳璋

吳璋字廷用幼孤爲鍛工永樂三十一年詔選天下節婦給役內庭母陸氏名在籍中宣德四年准王之

國韶州尋徙封饒州陸氏皆從行璋棄家奔走求母者二十年屢啓王請見輒不允書凡十四上情詞益切王憐而許之命入宮見母母方病革璋徬徨剖股作糜以進病稍間王聞愈憐之召賜金幣遣其母出至逆旅三日遽卒璋乃匍匐負骨歸葬先墓旦夕展拜淒動路人時正統十二年也後以子洪貴封南京刑部主事士大夫咸爲詩文美之號曰全孝翁年八十一卒贈太僕寺卿今列鄉賢祠

王錫爵曰吳孝子事類朱壽昌壽昌生不識母日昧

昧焉望塗而索其所不可知其爲力難而孝子辛苦丐乞仰鼻息於尊王貴璫之手似易而尤難而其卒皆至於得母顧壽昌之母優遊祿養者又數年理不宜以溝壑死而陸母之得出也距其死三日耳片息之視若有所待而畱者使孝子猶得以肉代糜申其一日之養天之祚孝子甚怪而巧不可謂之不幸也昔者唐德宗以天子之尊物色其母四十餘年竟不得徒望祭追號以紓其慕思此豈其力不足哉天子之意侈而匹夫之誠專天固有至有不至也彼其饑

寒暴露足繭口吃夢吟嚶而覺呻呼徒倚側息於宮
牆咫尺之間此其一日足當四十年其可以得母何
惑焉

潘翼

潘翼震澤農家子少爲里中黃景融家奴遂冒黃氏
執役勤恪正統初中官奉詔督徵逋稅行部稍不如
意輒執令去時縣令被執景融爲稅長與其黨攘臂
奪還中官訴於上詔捕誅景融舉家惶駭翼請曰主
僕卽父子耳願代死無悔遂就捕至京師論死拷掠

無完膚終不易詞後赦歸景融感之更加巾服與諸
子竝列約死同葬於墓翼目不知書而從容就義人
以爲難

吳瑄

吳瑄字元玉少從父戍京師宗族不相知者數年父
死哀痛倍至一日得其族譜大喜祭告其父將歸訪
焉時人或嗤其迂成化五年舉進士拜南京工部主
事累遷郎中事母至孝母愛少女令與壻同居壻無
狀瑄弗與較積三十年無間言舅氏在松江貧母念

之理爲買田宅以慰其心同族雖疎遠遇之有恩族
子鳳捨身釋氏迎歸撫之道遇故人喪不能歸遣使
扶持還葬在工部時吏有粥子贖罪者理憐之白於
尚書爲免吏罪性好學工古詩文對客立就未嘗屬
草又善書畫卒年五十二理義而貧仁而不壽孝而
無子時人莫不哀之

顧寬

顧寬字惟仁性孝友居母喪三年不入私室初以弟
子綱爲嗣後生二子純綱待之如一族人灑貧不能

存寬計日給食有事則資以錢布終其身外祖李昱
墓枕吳淞江屢經水患寬出錢千緡累石捍之有錢
璫者寬之從姊壻死無以葬寬買地葬之及掘地得
故塚復命掩之而他擇焉其好義類此年八十乃終

龐鏞

龐鏞字汝聲性好施予成化十七年邑中大水鏞出
粟千斛賑之弘治五年又水鏞復出粟二千斛賑之
撫按嘉其好義不倦以事聞命有司榜其門曰旌義
復其家

吳成

吳成尚書吳洪僕也洪爲諸生應南京試成驅驢取值以供旅費及洪爲福建按察使有富人犯法持千金賂成求寬成却不受以白洪竟置於法繇是洪名益起吳氏至今思其賢配食家廟云

顧宗義

顧宗義字惟正世居城西流虹橋與兄宗仁相友愛終身不異爨後宗仁無子宗義命長子言嗣之畀以故廬而別與次子行耕於充溪相距數十里每遇蔬

果薦新之日必賚以奉兄度兄已先嘗然後敢食雖家人亦毋敢先食事無鉅細必稟命於兄數十年如一日也正德中歲饑宗義嘗捐貲以貸里中鄰有暴橫者宗義不與較徐理論之其人感悟謝罪僕沈原母病疫將死原不敢歸視而流涕不已宗義問知之卽率原往視其母獨臥一室目猶未瞑問所欲曰思飲耳乃汲水與之復歸取粥食之時鄰人相戒不敢入室宗義獨與原親問遺之日再往如是者月餘原母卒無恙有司聞其行誼屢請爲鄉飲賓竟謝不赴

嘉靖初卒年八十有二
李濟字民望麻溪人父璇遭危疾濟年十二卽刲股作羹以進璇遂愈又三十年乃終濟居母喪廬墓三年不入私室督學御史蕭鳴鳳雅尚德行命濟食餼以風學者嘉靖二十一年以貢爲衡州府學訓導

沈忠

弟孝

沈忠與弟孝皆聖人皆善事其母嘗禱於天冀益母算每受役於人所得肉各懷歸以奉母知縣劉時俊

潛得其狀曰此穎考叔也爲請於上臺而獎之

陸恒

陸恒字貞惠學通五經萬曆三十六年以貢入太學祭酒李廷機拔其文第一爲貴池訓導卒性篤孝長洲陳淳爲其父鯉畫像甚工恒出必攜以隨後爲人所竊恒素不善畫自傷無狀卷帙放失泣涕彷徨晝夜形髣心慕手追遂成父像鄉人莫不感其孝焉

陸雲衢

陸雲衢字彥遠家貧力學授徒爲養母患危疾雲衢

顧天請代尋霍然父復苦癱瘓飲食皆親哺之潛割股和羹以進久之父遂起鄉里上其事萬曆中巡按御史下檄表之

戴天敘

戴天敘字存南年三十餘屢困童子試或勸之爲吏不可曰是辱身也未幾補邑諸生嘗館陳氏陳故爲人僕主者籍其財陳囊金六百兩暮夜投天敘天敘以鍤缶瘞之地中旣而陳死其妻饑窘踵門乞貸天敘曰若夫金故在盍取去其妻謝不知也天敘啓瘞

悉還之其妻泣拜去初陳之寄金也人無知者獨有從子頗覺之及其還金也人亦無知者而從子以爲金故在未還也因求爲嗣天敘以序不當立拒之後天敘生子從子計始阻萬曆中天敘年六十卒所生子弱從子欲奪其金乃僞爲分券訟之官凡十餘年從子雖伏罪而其子家遂蕩然矣天敘孫鼎立有奇節亂後隱居著述爲余言如是

吳承恩

吳承恩太學生家素饒父邦棐爲市人所辱承恩募

少年立殺辱父者以此傾其貲崇禎中年踰九十卒
蕭雲程

蕭雲程字漸于其先山陰人元時有國寶者爲邑訓
導因家焉雲程性質厚好詩崇禎十年巡按御史路
振飛疏言雲程孝友性成母鄒氏病篤刲股進藥沒
而廬墓繼母施氏患痢籲神請代卒獲痊族嫂孀貧
割產贍給鄉人失金坐待完歸養喪夫之姪女葬受
業之亡師皆宜旌厲詔可明年禮部侍郎顧錫疇復
列其行命擢用不果

吳允夏

曾祖秀

吳允夏字去盈曾祖秀隆慶五年進士授刑部主事
歷郎中出知九江府巡按御史檄下司理勾稽贖鍰
至三千金秀請除其十之八鑿龍開河得良田三千
頃又鑿老鶴河便商賈泊宿時爲之謠曰民不死吳
公是子客如歸風伯無威遷知揚州府復五塘建義
倉爲民永利遷福建按察副使被劾免後列烏程鄉
賢祠允夏博雅好古尤邃於理學事母素謹初猶過
於嚴恪及德器旣成乃更爲童孺之色以順適母意

然其治家嚴肅如公府內外截然無敢踰者家世多藏書篝燈討論每至達曙雖醫藥卜筮之術無不究心文詞雅健入太學累試不第杜門著述崇禎末歲饑米貴小民相率掠富家幾成大亂允夏慨然發粟賑濟綜理有方人不敢欺全活甚衆嘗感火葬非古作廣孝哀言以警衆因自置義塚一區瘞浮尸若棺無王者至是道殣相望允夏募人掩埋半歲間得五千有奇其他實惠及人不可勝紀知縣葉公翼雲重其行遣使致羊酒謝不受中年連舉二子人以爲積

善之報

陳國珍

陳國珍字公獻母失明僦居城外鬻餅以養崇禎十三年家失火母不得出國珍號泣躍入從煙燄中抱持以出皆頭額焦灼不可識遂相繼死聞者傷之

孔尚賢

孔尚賢字廉石以善裝書名邑中質直有士行嘗拾遺金於道堅坐待失者至還之士大夫高其誼多贈以詩篇尚賢無子還金後乃舉子世其業至今

陳清字西雍邑諸生居盛澤賊至父紀昌被縛清給
之曰此我家蒼頭也遂得釋而清被殺
迨紹原

迨紹原字休仲邑諸生師事楊廷樞廷樞遇害蘆墟
縣首於市紹原贖其首殮焉人皆義之

松陵文獻

獻集卷九

人物志九

邑人潘樞章力田撰

文學

宋

謝景初

謝景初字師厚濤之子慶曆六年及第以大理評事
知餘姚縣始作海堤防水患民賴以安以屯田郎致
仕性倜儻勁峭博學能文尤長於詩每爲歐陽修梅

堯臣所推重黃庭堅其壻也自謂得句法於謝公云
弟二景平字師同以蔭授校書郎第進士終秘書丞
工詩景回字師復年十九所爲文詞已可傳載
元

盛輿

盛輿字敬之初爲震澤鎮學教諭遷錦州學正會兵
輿爲浙江行省叅謀擢崇德州判官輿嘗受易於同
郡龔子敬好古博識醫卜地理星數之書靡不通究
所著有韻書羣玉滴露齋稿

張淵

張淵字清夫博學好古有詩名尤工書法皇慶中以
薦爲東省提舉有心遠堂集虞文靖公集爲序

明

黃本

本吳驥同里先哲記

黃本字本中先世自江夏徙蘇郡元季兵起張氏據
郡城網羅才士本中乃避地同里授徒資養遂畱家
焉洪武中舉明經爲武夷訓導歷會昌教諭於經史
百家之書研極理趣其文章豐腴雅馴詩詞藻麗典

則無愧作者游遭兵燹遺稿多散佚識者惜之

凌昌

先中

凌昌字正卿同里鎮人家世業儒性聰慧強記尤邃於書微詞奧義多所發明從元儒潘如珪游至正間舉於鄉會道阻遂不復就試以圖史自娛爲文章汪洋而明潔放言極論一歸於理洪武十二年舉明經授縣學訓導遷太平教授卒於官

同里先哲記云承部檄分教邑庠仍

薦之當路未及祿位而卒蓋教職猶未授祿故云

所著有儀古集子德修字

子成洪武二十一年舉明經初爲嘉定訓導遷寧縣

廣昌教諭吳驥稱其文章皆本義理如布帛菽粟之有實用壽終於家

陳謨

徐彰

陳謨字昌言初爲童子師於經史正句讀通訓詁而已及其沉潛歲久學進理明才思煥發凡唐宋以來大家之文皆含咀其英華規模其步驟故詞章精敏過人而詩律有涵蓄學者宗之同時有徐彰者字天章其學邃於史書長於詩律辭鋒敏捷四座風生與謨交情誼欵洽每時和景明則治具共遊靈巖虎丘

諸山窮日夜爲樂所至必聯詩寫景歸以詫其鄉人其所蘊莫能測也

陳玠

從弟琮

陳玠字以進其先東平人元時有爲吳江州掾史者遂家同里少從黃本學博綜羣書才高識遠見昔人行事成敗必剖析其故疊疊清談聽者忘倦發爲文章理明辭暢爲詩務合唐人音響不以雕琢爲工混跡田夫野老間明哲保身之士也從弟琮字叔振亦能詩長於七律近體書法道美永樂初徵起書誥勅

居南京有年而未沾一命終於家

鄒奕

鄒奕字弘道大父士表好義多延名師教之楊維禎贈詩有云爾祖傳經如傳寶冢孫十歲早能詩蓋美奕也奕秀日美髯貌若玉雪議論英發文辭高古元至正八年舉進士調饒州錄事洪武初爲御史出知贛州府坐事謫甘肅二十餘年永樂初以蹇義薦召還與同郡沈繹丁敏輩交最善有吳樵稿

沈黻

沈黻字有莊家世治尚書洪武四年舉明經賜光祿
酒饌尋放還嘗應辟署縣學西齋事所作詩文號西
齋集

蕭規

子潭湘

蕭規字元則其先楚人明初徙居吳江再徙郡城初
從釋氏已乃棄去爲儒其學長於春秋毛氏詩然不
求仕販鬻自晦爲文亦鬱茂有體裁人或從索之多
謝不能人稱竹園先生所著有湖山樵寓集子二潭
字孟南建文二年進士終建始知縣湘字仲南永樂

中舉秀才授中書舍人終大理評事皆有文學能世
其家

朱應辰

朱應辰字文奎綺川人少爲陳氏禮習舉子業元季
累試不利乃棄去爲古文詞與楊維禎游洪武四年
以薦爲郡學訓導

或云終於江陰訓導

卒應辰爲文繁而不猥

詩亦工爲長短句篆籀逼古國初嘗命書符印其外
孫都穆爲刻其詩傳之

陶振

陶振字子昌其先華亭金澤人贅於龐山謝氏遂爲
吳江人少與謝常同學於楊維禎兼治詩書春秋三
經洪武二十三年舉明經授縣學訓導嘗坐佃居官
舍逮至京師換紫金山金水河二賦以進隨奉命換
飛龍在天賦多雜俳調皇太孫以聞得釋遷安化教
諭歸隱九峰間授徒自給一夕死於虎王達挽詩云
昔爲海上釣鰲客今作山中飼虎人釣鰲客振自號
也振才易辭近卑俛爲時格本無足稱而爲經生者
本之皆名陶氏學云所著有釣鰲清嘯二集集中載

哀吳王渢詩乃指斥靖難之詞蓋振卒於革除間故
也

梁時

梁時字用行學爲文最苦少時遭家籍沒復聚徒講
學於長洲洪武二十一年以善書選授岷府紀善永
樂中遷翰林典籍預修大典充副總裁其文章以氣
格爲主不事纖麗亦善筆札有噫餘集吳驥曰時風
流儒雅持身以禮無窘步惰容雖席父兄之資不尚
綺紈之好旣罹家禍安貧晏如屬文賦詩清粹有法

楷書行草各臻其妙潘子曰劉鳳先賢贊言時之父
初以博得婦生時逾歲又博而負人携之去時少則
隨母長乃走會稽山中讀書此委巷流傳之語不足
信也今考者舊傳所云席父兄之資不尚綺羅之好
則時固富家子豈博徒之後哉又云罹家禍安貧晏
如與徐志遭家籍沒之語合余聞吳中黨禍之酷起
於梁氏見於莫旦所記甚詳豈時卽梁氏之族而株
連得禍者耶噫亦可哀已

吳驥

子鉉

吳驥字材良同里人父誠贅於何氏性耿介不屑與
時俯仰故終身不仕驥家貧力學恬於勢利洪熙元
年舉明經授濬學訓導正統元年改壽昌遷清豐教
諭致仕卒驥博學強記教人嚴而有法時稱名師山
西河南陝西諸省鄉試凡五聘爲考官所取皆名士
卒年八十三所著有蒙菴集歸田稿正統十二年爲
山西考官所命
詩經題維周之楨犯楚昭王諱禮部請
罪之上不問第罰俸一月事見實錄子鉉字時舉
天順六年舉於鄉授四川布政司經歷董永寧軍儲
九姓長官任氏沒而無嗣宗族爭襲上官令鉉訊問

偽者以重賂通却之而直其事致仕歸年六十三卒
爲人沉靜質實居家孝弟威寧伯王越師事其父與
鉉交厚及貴未嘗往謁人以此多之與驥同時有吳
鎮宇陽稽能詩見湖海耆英集又有吳璩與同郡徐
庸賀甫等竝以詩名

莫旦

莫旦字景周震子也博學工詩文成化改元領鄉薦
卒業太學作一統賢關二賦名動京師授新昌訓導
九年遷南京國子監學正乞歸年至八十餘卒旦居

家有法嘗翔石湖鄉賢祠平生著作甚多嘗論吳澄
以宋臣仕元不當列從祀趙子昂以宗室事讐不得
爲名臣皆名言也邑乘自宋以來歷朱長文竇德遠
吳本前後綜述雖方策備存而義例疏濶旦始爲諸
生卽考論掌故搜采舊聞積三十年始成吳江志典
雅可觀又有新昌志鱸鄉集傳於世

趙寬

趙寬字栗夫性警敏幼讀書數行俱下及長工古今
詩文下筆千言立就年二十一領鄉薦卒業太學時

王文肅公俱爲祭酒淡加賞識成化十七年試禮部
同郡吳文定公寬得其卷大驚遂置第一梓其文以
傳不加潤色授刑部主事歷郎中執法不撓工部主
事盛應期范璋以司牘忤中官羣訴於上逮繫部獄
禍且不測同僚皆避不敢鞠寬獨挺身任之二人得
從未減囚有當死者尚書欲出之寬不從竟置諸法
在部十四年以明允見稱出爲浙江提學副使以身
教士不受私謁品鑒精敏一經甄拔無不取高第者
凡七年士風爲之一變遷廣東按察使決滯獄禁和

買約束鎮守中官使不得逞俄以疾卒年四十九寬
善論文不徒識貴賤卽壽夭亦預決不爽爲文學韓
昌黎以未嘗屬草故多散佚僅存半江集十二卷今
列鄉賢祠弟宓字受夫弘治八年舉於鄉爲雷州府
推官改武昌通判投劾不仕宏善辭賦以清才稱有
漁菴集

姚明

姚明字景昭一字視卿家長橋之南號月橋居士重
厚寡言笑工古今詩文有所作人爭傳以爲式兼善

書法成化十三年舉於鄉累上不第授貴溪知縣民稠土瘠明以平易治之民甚安府有所需倚辦於縣明罷之見爲才諳不足遂調南靖在南靖四年一如貴溪時以母喪歸會有子坐事論死走京師訟之遇疾卒年六十四明貌不揚而蘊蓄甚富又能謙冲不伐故一時稱德量者必歸焉有月橋遺藁

崔澂

崔澂字淵父刑部主事齡四世孫也少爲諸生已厭場屋之習嘗受易於汝泰見所爲文問曰文止此乎

泰曰卽欲仕非此不可文豈但已哉澂笑曰寧不學仕不願爲此文也及例入太學遂絕意進取出所藏經史閉門誦讀窮日夜不休三年學成從其師曹孚謁同郡吳寬沈周諸名公質疑訂惑必揮其底蘊而後已尤工於詩氣象風格力追唐人蓋近代名家也卒年僅二十九有傳響集十二卷史鑑曰嗚呼自王安石經義之說行累朝循是道不變世徒知以明經爲尚殊不知其分截章句决裂文義以苟合有司之程度可醜也其間非無豪傑之士思欲振起之然父

以之教子兄以之詔弟卒不能易天下之滔滔此有志之士所嘗嘆息也淵父眇然一儒生獨能覺其非力追古不已而天遽奪之使不底於有成將斯文之運未復耶然則豈獨崔氏一門之不幸哉

王寵

王寵字履仁後字履吉守之弟也少從蔡羽學於書無所不窺而尤詳於經手寫皆一再過文宗遷固詩法三謝盛唐書在大令永興間寵才名遠出守上守既宦達而寵僅以年資貢入太學於是遊燕趙魏觀

廟朝制度與四方搢紳先生上下其議論而文益奇既數試不利乃築室石湖之陰讀書其中非歲時省侍不數數入城臨流賦詩倚樹而歌邈然有千載之思如是者又二十年遂卒年四十寵風神玉立猥俗之語未嘗出口聲稱振疊而醞藉自將不欲以所能上人人亦樂親附之太守胡纘宗甚高其行嘗行古鄉射禮請爲賓行古鄉飲禮復請爲贊寵儀觀肅穆見者咸嘆美之有文集四十卷袁表曰履吉詩初宗李白既乃宗杜故才力雄濶辭章麗贍去輕靡而就

沈著尚鋪綴而略陶鎔及白雀集諸篇則又與寄冲
玄思調清逸遂窺顏謝之堂幾入王孟之室矣惜乎
天抑其進有志未就故所著僅此然亦足傳矣

陳九章

陳九章字從一志操清遠弘治十八年舉進士授青
縣知縣調雲和以不善事上官罷歸教授鄉閭以文
學著名然家益貧巡撫鄧公以同籍來訪蓬蒿無徑
及卒不能歛知縣喻時高其行親賻焉

陳理

陳理字君明少爲諸生器岸軒特文亦雄健正德中
提學御史張璿至再試皆第一因命擬作請立先賢
子游後奏記理援筆立就璿稱善者久之五舉不利
晚嬰末疾在苒數年而卒理才華迅發鄉先輩多折
節與交恐不得當也吳尚書洪尤重之吳中士大夫
家記傳銘序諸作多出其手執親喪終始盡禮與周
公用情好尤篤理死用銘其墓感動時人所著有同
川集宋元遺事陳氏族譜四禮規諸書

朱旦

本鄧韞常熟志

朱旦字汝明從父寓學常熟遂家焉旦方嚴靜嘿行義不苟以師道自居鉅室錢允言氏敬禮之爲買田築室不聽其去旦所與接皆良士以文詞雅道相麗益其詩多選體年八十餘卒子臣字良臣以貢爲眉州學正賓字元賓性行竝肖其父有經學書法趙孟頫

陳策

附丁氏

陳策字獻可博極羣書爲詩文冲曷典核嘉靖改元領鄉薦授曹縣教諭卒於官繼妻丁氏撫尸慟哭嘔

血數升越次日亦卒曹人異之所著有說鈴九華集東行集曹縣志

張銓

張銓字秉道世居越來溪爲著姓銓文詞清麗嘉靖元年舉於鄉選爲膠州知州其地濱海饒陬俗勁易動屬歲饑流庸轉徙羣不逞剽劫爲亂銓禽首惡數人置之法餘悉解散因言於朝蠲常賦之半民用安集尤篤意教化修學宮選諸生俊茂者親爲講說經義有古循吏風遷南安府同知嘗攝府事又攝南康

信豐二縣所居職辦上官知其能數使治煩劇若經理屯田更定權課諸所建白皆著爲令盜起隣境殺略吏民銓承檄討之獲其渠率餘皆望風降不戮一人後入覲道卒年五十二銓風格高整機鑒精明未仕時已通達世務嘗與郡守議賦役法條刺十事言皆切至守雖不能盡用然內敬重焉及當官臨事智略輻輳每手削公牘頃刻數百千言雖老吏讀之無不驚服性孝遭父喪哀毀踰禮爲詩文雄壯激烈慨然有經世之志未究其用論者惜之有蓴江存稿二

卷子德載自有傳

顧大典

顧大典字道行曷之孫也生十二歲而孤依母家作孤兒行詞旨悃邑讀書過目成誦又喜學爲古文詞隆慶二年舉進士爲紹興府教授遷處州府推官萬曆二年徵爲刑部主事以母老請改南京兵部久之轉南京吏部郎中金陵多名勝地暇卽呼同曹郎載酒往游又善繪事能詞賦每以詩若畫模寫之或窮日夜忘返然於部事亦不廢十二年遷山東按察副

使主驛傳多所裁革改福建提學副使較文精嚴請
托不行忌者遂中以考功法追論爲郎時事坐謫禹
州知州大典遂自免歸再起開州不就葺先世故園
奉母供養其中非公事不入官署曰吾豈對不見貴
人哉性本疎嬾不偶世惜吾歸之不早也家有清商
一部嘗與客引滿盡觴流連竟日天情蕭遠不見喜
慍之色性和易醉卽爲詩或自造新聲被之管弦時
吏部員外郎沈璟年少亦善音律每相唱和邑人慕
其風流多畜聲伎蓋自二公始也大典所著有清音

閣集海岱吟閩游草園居稿子慶延詞翰清絕慶恩
字世卿爲徵江通判有惠政亦善畫名亞於父

沈璟

沈璟字伯英漢曾孫數歲穎悟有神童稱及長頽皙
朱顏睂目如畫萬曆二年舉進士授職方司主事以
病免尋補儀制司進員外郎調稽勲司歷驗封考功
二司以父喪歸復補驗封十四年二月上疏爲王恭
妃請封號忤旨左遷行人司正十六年爲順天同考
官遷光祿寺丞明年以疾乞歸歸二十餘年卒璟居

兵禮吏三部時邊徼阨塞及各將領主名皆有手記
入夾袋中親較宗藩名封諸籍不入吏手詢訪人才
不令人知順天所得士有長洲李鴻爲申少師時行
壻言者以爲私璟不自白及鴻舉進士知上饒與稅
監忤言者始息璟性謙謹而能任事晚乃習爲和光
忍辱有非意相加者笑遣之因改字聃和以自况性
喜誦讀精六書日親卷帙遇謬誤者悉釐正生平不
善飲兼少交游晚年杜門謝客寄情樂府先是邑人
沈義甫著樂府指迷璟復整齊舊章鳩集諸家增訂

九宮曲譜及撰論詞六則正吳編竝爲審音者所宗
自號詞隱生天啓初追錄國本建言諸臣贈光祿寺
少卿

莊元臣

兄憲臣

莊元臣字忠甫萬曆三十二年進士授中書舍人奉
使封平原安丘二王以母喪歸三十六年吳中大水
元臣條議荒政當事者采行之尋北上卒於濟寧舟
中元臣學無所不窺喜談經濟每閱一書必劈肌解
族扼要鉤玄嘗言讀舊書如遇新知讀新書如逢舊

識其爲古文辭經營極苦會意所至千言立就自言
少時習制舉業茫洋而思信筆而書如是者有年乃
伏而自思以爲先哲之文投機迎刃意必有準繩尺
度以運其間而非得之偶然者乃盡發洪永以迄近
代之文俯而讀仰而求如是者又有年如涉海求蓬
萊者頻年出沒於驚濤駭浪之中望之汪洋不見踪
跡今若見紫霞黃氣焉乃以暇時盡出先秦兩漢史
氏百子之書伏而讀之不厭則取唐宋而下及我明
諸名家文集讀之又不厭則取楞嚴法華諸佛經讀

之咸味其理掇其詞淡求其文章變化曲折之妙長
者尋其波瀾之所演迤短者究其根荇之所藏縮華
者研其精神之所色澤暢者釋其筋力之所發舒淡
者躡其濬鑿之途奇者考其神變之術於是文章之
情狀略已得其統紀條貫矣因爲文論十篇以明古
今作者之得失所著有叔苴子覺參符三才考略金
石謨鳳閣艸時務策凡數百卷兄憲臣字昆明亦博
雅士也

俞安期

俞安期字羨長孤貧流離潛心誦讀以博洽聞少客於龍君揚受國士之遇君揚被譴入楚慰之遣戍永安又入豫章送之與楚人丁元甫爲意氣之交元甫沒厚遇其子海內歸義焉年三十爲五言長律百五十韻投王世貞世貞獎厲甚至先是邑中王叔承以布衣游公卿間名籍甚安期後起名遂相亞叔承雖好山水然守母遺訓未嘗遠遊安期一出十年周覽五嶽所至觴酌流行絲肉竝奏酒酣坐歡俯仰長嘯聽者皆歎其有鸞龍之音又多技能好相人宅冢沾

沾自喜後徙家陽羨山中老於金陵有琴瑟集數十卷錢謙益曰羨長巨目曷鼻魁顏長身狀貌如河北儉父與之談盱衡抵掌意勃如也才氣蠡涌晚亦知厭薄其窠臼而聲調時時闌出不能自禁蘇子瞻所謂浙人語終老帶吳者也子二長棄家爲高僧卽箬菴和尚次南史字無殊亦王詩和雅冲澹類其爲人

潘一桂

潘一桂字無隱一字木公父以賈僑居京口一桂少機警過目成誦頗自負不肯專心諷誦父怒命之揚

州爲賈一桂乃更讀書爲歌詩自謂無意學古而神與之似於是詩成輒書屋壁間風情溢發久之湖州沈聖岐以宦游道揚州見壁間詩大驚勸歸就學補邑諸生時鎮江章詔有詩名一桂與相引重又念賦學衰廢思一振厲之乃杜門擬議與友人錢玄密緯以閱博相砥礪作東征昌言諸賦爲時所稱二十餘歸故里與卜舜年同學諷習楚辭嘗縣肘後其結撰愈工焉性嚴整非義不動崇禎五年唐世孫好詞賦延四方賓客起高明樓擬於雁池兔園以書幣招之

再三辭家人怪之一桂嘆曰極知世孫嚮我厚然國家法不得與藩邸交我何敢爲亂首耶後遊襄陽世孫已立爲王遣使迎候不絕於道一桂不得已命駕往王數從授簡賦詩雍容應教居畱一月稱疾辭歸期年王廢同時在國中者皆株累坐法一桂獨以見幾得免卒年四十五有文集六卷古韻通考二十卷錢謙益曰無隱詩多弘麗今集爲史弱翁所定多取其膚立者賦則爲西極文太青所推太青以揚馬自負目無一世見無隱諸賦曰我心折氣澁矣無隱之

可傳者其在斯乎子陸字江如有志節於詩律尤精

卜舜年

莊汝培場二俊

卜舜年字孟碩盛澤人少孤有異質喜詞賦書畫年十八秀水令顏欲章得其文奇之勸令求師遂補諸生讀書廢寺小樓在塚墓間四顧寂然手一編慷慨吟諷華亭陳山人繼儒見而異之引爲弟子授以河雒讖緯支干營陣之學嘗周其貧舜年性好客坐恒滿旣不得意更爲奇服驚衆聞吳門有老國王張懷僊善吳歛則從之學盡得其妙有時騁伎登壇珠玉

一轉聞者皆爲流涕一日大悔立功過案自考已更學長生之術竟以瘵死年僅三十四舜年志氣雋爽爲文天趣甚高然不循矩度故名不出於州里亦每以此自恨及卒之後遠近傳爲仙去比於唐之李賀有遺集四卷舜年於世少所許可顧獨好潘一桂莊汝培之爲詩也汝培字端甫與舜年唱和最富舜年詩思敏捷而汝培獨以沉著勝然兩人更相推重也與舜年同里居者有湯三俊字俊民亦有雋才能通世務崇禎七年總督三邊陳公奇瑜以討流寇請叅

軍謀書檄奏記援筆立成卒於三原道中有遺稿四

卷

周永年 本列朝詩集

周永年字安期恭肅公用之後少負才名制義詩文倚待立就才器通敏風流弘長禪宮講席西園北里叅承錯互詩酒淋漓莫不分身肆應獻酬曲中海內咸以通人目之晚而扼腕時事講求掌故思以桑榆自奮遭亂坎坷卜居吳中西山未幾而沒所著詩累萬首信筆匠心不以推敲刻鉢爲能事錢謙益雅重

之嘗有詩云安期下筆無停手元歎撚毫正苦心人以爲實錄元歎謂吳人徐波也永年於邑中文獻多所哀輯知縣熊公開元嘗以續志屬之業有成藁遭亂散佚淡可悼惜云

沈自然

沈自然字君服琬子沈氏世有文采而自然獨工歌詩有至性孤峭絕俗家貧雖蔬食不給閉門諷詠不輟於人少所許可凡世所稱賢豪長者一言不合輒謾罵去以故名不出於吳而山陰祁公彪佳雅知其

才每造請讌飲商推不倦自然竟以苦吟眉髮盡落
居母喪神傷骨立數月而卒族人私謚爲孝介先生
妻嚴氏素賢以痛自然故數月亦卒鄉國聞者無不
傷之

吳翮

吳翮字扶九貌魁碩善談論少負才名喜結客復社
初起翮與同郡張溥楊廷樞等實爲領袖家饒於貲
四方造請者無不滿意有俊厨之目會國變遂絕意
進取杜門著述爲詩文多直抒胸臆不尚鞞藻所藏

明人文集至三千七百家手自編輯歲饑出粟煮糜
活饑民數百里中德之乙未秋卒年四十六所著有
升恒堂集

史玄趙渙

史玄字弱翁天才雋拔學有根柢與吳易趙渙齊名
以古文詞相切劘有東湖倡和集三人者才氣相埒
也後易登朝死國難而玄與渙俱落魄不偶玄畱心
經濟嘗從水道至京師作河行注一卷鹽筴河漕之
要略具焉數遊公卿間以策干時無所遇困頓以死

松陵文獻
詩宗少陵老健無敵古體尤工渙字少文學行醇謹
工五言先易卒

松陵文獻

獻集卷十

人物志十

隱逸

邑人潘檉章力田撰

夫自古高尚之士必擇幽邃之區以遯跡其中然後
可以遺世而肆志松陵古名勝地自漢唐以來達人
畸士長往而不返者往往托足焉而記載寥闊姓氏
無所表見者亦不少矣今考宋史文集得松江漁翁
等數人其行誼甚高至於明代一二韋布之流如史

西邨王崑崙諸公皆顯而無跡隱而有名斯亦足以
風矣故具錄之以爲隱逸傳

宋

朱象先

朱象先隱居樂道與蘇軾交甚密軾嘗題其畫謂象
先能文而不求舉善畫而不求售曰文以達吾心畫
以適吾意而已

松江漁翁

松江漁翁者不知何許人恒櫂舟遊長橋往來波上

意氣自得醉則扣舷而歌紹聖中閩人潘裕自京師
調官回道吳江遇而異焉起揖之曰予視先生氣貌
固非漁釣之流願句緒言以發蒙陋翁曰吾厭喧囂
處閒曠迹跡於茲三十年矣幼喜誦經史百家之言
後觀釋氏書今皆棄去惟飽食以嬉尚何所事裕曰
先生澡身浴德如此今聖明在上盍出而仕乎翁笑
曰君子之道或出或處吾雖不能棲隱巖穴追園綺
之踪竊慕老氏曲全之義且養志者忘形養心者忘
道致道者忘心心形俱忘其視軒冕如糞土耳與子

出處異趣子勉之裕曰幸聞先生之高義敢問舍所
翁曰吾姓名且不欲人知况居室耶飲畢鼓枻而去
李無晦
李無晦字行中自雪川徙居吳江高尚不仕放意詩
酒晚治園亭名以醉眠蘇子瞻兄弟嘗過之爲畱題
云

孫銳

孫銳字穎叔咸淳七年舉於鄉宋亡遂不復出隱居
平望之桑磬邨有林泉之勝時時賦詩寓意今所傳

者有耕閒集蓋宋之遺民也

明

朱良實

朱良實字子誠父鳳有樵唱集良實讀書好古在元
季有文名入明已老隱約不仕以詩文自娛號百拙
老人卒年八十餘所著有松陵續集漁唱稿

史玄曰縣固水國西北負土士民居其下者戶饒嘉
木之榮溪藉石雲之潤故棲逸之徒多服道其中良
實諸人因托爲逸壤嗚呼賢哉

顧諒

顧諒字季友後陸巷人博通經史作儀禮注值元末兵亂隱居不出性夷易不事畛畦結廬曰怡齋自號癡叟王行爲癡叟傳曰予初識叟以其聲求之殊不類及讀其所著鷓鴣居樗賦始知之賦之要以爲鷓鴣以微而依匪材之樗故能全其樂人謂其知白守黑者知白守黑欲進而退退所以進之術也叟寧是耶蓋虛以鍾其美耳其詞有曰以鉅而自屈於細兮致若是之遭迂苟忘微而夸大兮亦與是而同途是

又明夫各順其天不忒其儀之道也謂之癡者果非癡耶受以爲癡者果癡非耶君子蓋知之

張疇

張疇字季連世居越溪以貲雄於鄉而疇獨輕財好學構素心堂日吟詠其中三吳名士多從之游自號南邨居士二兄瑄瑾皆以人才爲顯宦疇毀形閉門自守而已州縣徵辟皆不就後竟坐黨禍籍其家所

著有陶菴集

謝常

謝常字彥銘少與陶振同師揚維禎學識該博著作

醜麗尤長於四六洪武十五年舉秀才徐志在二十三年今考桂

軒集乃在十五年八月召見試丹鳳朝陽賦稱旨欲官之常以

母年百有六歲請歸終養許之遂隱震澤之東溪教

授生徒至永樂初猶存年八十三卒有桂軒稿東溪

集

尹寬

尹寬字孟容黎里人性曠達隱居不仕號江南布衣

工詩文與郡人杜瓊陳寬輩齊名成化初卒外弟汝

訥為詮次其文號易齋稿

史鑑

史鑑字明古曾祖彬以高貲為稅長有任俠名坐累

死秀水獄或云即仲彬建文時為翰林侍書有致身

錄記從亡事甚異不見於他書不立傳鑑博學洽聞

年十二三為四六近體語即驚人既長肆力為詩文

雄淡古雅崛然成家足跡不出百里而人皆知其名

狀奇偉須髯奮張與人論事辨說超卓雖尊貴無所

屈長於史學論千載事如見若錢穀水利之屬尤所

淡究隱居穆溪之西有園亭竹木之勝圖書供具皆
極精麗客來就鑑鑑爲設先代之容曳履揮麈清談
彌日其治家嚴如官府動遵古禮患里人以巫覡惑
衆上書於縣欲盡除之曰此皆不容於先王之世者
不除則風不正禮教何由而行耶巡撫王恕聞其名
延見與論政務淡器其才嘗虛心咨訪未嘗以部民
遇之弘治中卒年六十三所著有西邨集西邨雜言
小雅日抄禮疑禮纂諸書

劉鳳曰明古性善交請謝賓客不吝算器家故饒四

方士歸焉雖在閭左名出公卿間郡縣吏皆下之有
所論議亶亶不窮頗亦愷激聽者爲傾有縱橫才若
盡地利植經業賈市治生產故其習氣無論好書多
所通解爲五言亦爲數君子所稱池館宮室占水地
勝供張甚盛古圖籍雜器陳之西序詭衣冠與客談
笑有四方志未遂少謁於徐公有貞而吳文定公與
爲友王三原素好士亦以吳雅稱之故禮焉然論者
猶謂其善市名或以爲文定累云昔白圭遭戰國以
其術行之時而明古僅因以名亦由使者賢不替干

旄之風憲孝間一時推盛雖在野亦有人矣哉

潘子曰余讀史氏致身錄曰異哉所聞以吳文定所
撰墓志及明古家狀考之乃知彬以稅長洪熙中嘗
上書闕下蓋富而好俠者也且未曾入仕何論從亡
余少時嘗見明古所草縣志於仲彬事亦絕無記載
或以爲畏禍故諱之耳乃西邨集於姚善周是修之
死皆爲立傳無所避忌顧獨於先世之隱德沒而不
書且并其官闕而削之有是理耶况孝廟時法禁已
弛吳文定固賢者又以著述自命不宜汶汶若是夫

爲人子孫者其先祖有是善而弗傳是悖也無是善
而強名之是誣也然則爲此書者不惟誣仲彬且誣
明古矣余不敢信爲實錄也劉子威先賢讚於明古
頗多微詞要之其任俠負氣亦自有祖風哉明古長
子南園君名永錫爲諸生孫南湖君名臣爲雲南叅
議其卒也臣之長子龍灣君名長爲行狀云寒家文
獻起於西邨然而補弟子員自先大父始入仕自先
君始長工書法今此狀真跡猶存卽刻本亦多傳人
間可據以證致身錄之贗

曹孚

曹孚字顒若平望人訓導謹玄孫也隱居工詩文善摹寫景物與同邑史鑑尹寬練塘凌震爲詩酒交號四大布衣尤閑於禮儀人有婚喪必質之而後行無不允當所著有楓江集平望鎮志

王雲

王雲字時望宋大冶令份之後好古力學早歲能詩與沈石田周白川爲友自言性耽吟咏遇物適情卽爲品題不下千百餘篇但身經淪喪直以骯髒無賴

顛頓憂鬱之態發抒於其間耳藏之名山傳之其人雖曰未能然繕寫卷軸投贄公卿之間竊所不願也居家孝友所積書幾千卷皆評閱數過丹黃相覆其勤如此正德末天子南巡將遂溯江西上縱遊雲夢武當而寧藩陰蓄異謀伺隙而動雲以白川備位大臣無所獻替貽詩誚之白川亦不忤也雲爲諸生屢舉不第晚年再預鄉飲學者稱爲葵南先生嘉靖中卒年七十有六

王叔承

王叔承名光胤以字行更字承父自號崑崙山人少受博士業弗好好古文詩歌觸景匠心不爲剽剝應酬語已而好遊所感遇悉發爲詩遊吳越諸山水間作吳越遊編入閩作荔子編汎洞庭登九疑太和作瀟湘編遊齊魯燕趙縱觀恒岱諸山作嶽色編初叔承貧甚贅錢翁女以不能曲事翁若媪攜其婦出翁怒不予一錢叔承意廓如也有所善少年商生者爲叔承謀曰吾聞趙王賢而好客盍往遊乎乃與俱之鄴而鄴時有客謝榛鄭若庸皆以文重於王然見必

蒲伏稱主臣叔承覘知之歎曰屈吾膝而奉吾口腹何策會商生病死葬之銅雀臺下因北入京師時世宗齋居西宮諸大臣應制謔青詞多假手文士而叔承客興化李公春芳所春芳強使爲之叔承謝不能第爲草遊仙數章上覽而異之於是春芳大喜延之直所得縱觀上林太液宮闕禁籞之勝爲漢宮數十曲京師爭傳誦之然叔承意不自得輒謝去與王公錫爵范公應期胡公淳顧公養謙輩爲布衣交相得甚驩所至爭迎候之而叔承性簡亢無加禮意所不

可面折無所避或資之遊取給而止淳以直諫死家
不具饘粥叔承慟哭經紀其喪且振業其二子人比
之原巨先云

沈汝和

本吳默撰傳

沈汝和吳江布衣也貧甚授徒自給修脯之外一無
所取不得有一縑一粟之餽主人強之則怒形於色
與人交煦煦和易口不談人過知縣劉時俊表其門
曰廉真逼古人以爲當年八十餘猶手不釋卷一室
蕭然其子以窘故或當午僅具饘粥頗慙悚汝和曰

吾正喜粥人招之飲未嘗不赴赴未嘗不盡歡坐中
與客稱說古今娓娓忘倦一聞勢利猥瑣之談輒緘
其口嗟乎若汝和可謂窮則獨善其身者矣

朱鷺

朱鷺字白民初名家棟爲郡諸生性至孝家貧授徒
以養父頗能詩好禪理隱居華山中寫墨竹售之以
此自給公卿罕見其面萬曆中議修正史鷺著論以
爲革除四年之事孫蒙祖號死亂生年失無大於此
者宜斷以史臣之權爲建文帝立本紀復其年隨錄

其當時行事以存一代之典乃倣綱目作建文書法
儼其後言者數以爲請上遂下詔復以建文紀年其
議實自鷺發之爲人長身玉立風神閒遠崇禎初甘
露降於華山撰甘露頌欲詣闕獻之竟不果至五年
卒年八十

翁遜

翁遜字仲謙居城西門外性高潔獨行一意不喜見
流俗人爲詩淡遠多苦思亂後西郊多吟社遜所與
唱酬者自徐白顧有孝二人而外足跡未嘗妄有所

詣卽其門人來候有不如遜意者輒斥不令見嘗踽
踽獨行野外遇荒林曲徑則徘徊吟賞至於衢市所
在必紆道避之晨炊不繼意泊如也隣有好事者或
歛粟賙之遜義不受卒窮餓以死惟詩百餘首傳焉

包捷

包捷字驚幾少有文名崇禎十五年舉於鄉亂後變
姓名隱居陽山吳易死於杭親族莫敢視捷潛往收
其骸葬之壬辰歲卒貧無以殮篋中惟淳化帖一部
鬻以具棺云

徐白

趙瀚

以下續纂

徐白字介白本嘉興人徙吳江性狷介不苟取予以諸生久次當貢遭亂棄去隱靈巖之上沙有園數畝無子女不蓄僮僕手一鎌種蔬藝果拮拾自給暇則坐小樓作畫吟詩詩幽秀得晚唐風致畫蕭疎無俗韻不爲人作自娛而已故舊相尋掃落葉汲泉烹之清談終日使人忘世三十餘年不出山人謂之石隱所善趙瀚字砥之士諤之孫亦需次當貢棄而耕於野盡亡其世業家無儲粟宴如也爲人清恬和粹不

以氣節自高人尤重之與白先後卒

戴笠

章夢易顧偉

戴笠字耘野初名鼎立字則之祖天敘見孝義傳笠孤貧力學爲諸生文行炳著渾厚薦誠與人居溫溫終日而志節凜然非其義一芥不苟乙酉後入秀峰山爲僧得禪學宗旨久乃返初服教授自資勤於著述謂明亡於流寇綜其始末以月日爲次作寇事編年采輯明末死義諸臣事蹟作殉國彙編自將相至布衣無不詳載別紀烈女爲骨香集後死者爲耆舊

松陵文獻 卷一
集爲發潛錄又有聖安書法文思紀略魯春秋行在陽秋等書共數十卷居同里之朱家港土屋三間旁穿上漏炊煙時絕略不關懷惟孜孜編纂雜采朝報野史叅之見聞口訊手鈔老而不倦海內著述家服其精博惜多散佚不傳時同里又有章夢易字兩生幼工舉子業有盛名中年棄去潛心經術著易筌詩源左氏兵法楚辭補注凡若干卷顧偉字英白濛明象數通曉曆術著書滿家皆博物洽聞隱君子也

吳宗潛

弟宗漢宗泌從子炎

葉繼武吳珂附

吳宗潛字東籬崑崙山人王叔承其外祖也兄弟七人及從子炎竝有雋才而宗潛尤雄肆爲諸生試輒冠其曹意不屑也雅負經世之學申酉間奮身許國與弟宗漢宗泌往來兵間數蹈危難兄振遠死之旣乃歸隱嚴墓村與吳興沈祖孝范風仁嘉禾金甌朱臨同邑葉繼武吳珂等結驚隱詩社士之高蹈而能文者胥集焉歲以五日奠屈原九日祀陶元亮而宗潛常爲之祭酒已而文字之獄數起宗潛遂隱於醫著名茗雪間治疾不問貴賤惟當事招之則不往人

謂其通而介年七十八卒病亟猶口占古詩數百言
袞袞不竭焉葉繼武字桓奏爲人溫厚靖淡薦於氣
誼居唐湖濱有煙水竹木之勝好友過從文酒雷連
旬日不倦家故饒以好事破其產圖史蕭然興趣彌
遠詩警切無浮聲吳珂字匡廬耿介有節槩詩思刻
淡結撰務出人意表同人服其奇雋

宗漢字南村宗泌字西山竝有異稟博學工文辭宗
漢真純有至性一日學使者集諸生問行孰優舉宗
漢者至百餘人無異辭平居恂恂體不勝衣而激於

忠義之死不避遭伯兄難棄家遠引久之乃歸雅好
濂洛之學而不事表襮克養醇粹望而知爲哲人君
子詩篇體氣高邁超然絕塵年未四十卒嘗以全歸
自矢竟成其志宗泌強毅能辛苦以身徇義奮不顧
家意有不得一發之於詩思致澁沉音節適美甚得
中唐風格竟侘傺以死

炎字赤溟年亞諸父而才與之埒亂後棄諸生隱居
教授初以詩文自豪旣念明代未有成史銳欲論撰
而所善潘樞章與之同志乃約共成一書炎所任世

家列傳二百餘篇博討國史家傳及郡邑志乘矻矻
編纂寒暑無間手藁數易將有成書會南海莊氏有
史獄炎名在叅閱中遂及於禍在獄賦詩慷慨神色
不撓死後家口北徙妻張氏自殺於齊化門炎天才
矯拔文筆勁健作史傳甚有體裁詳而核簡而明美
惡不掩有古良史風遭難遺藁散佚人多惜之

張雋

董二酉

張雋字文通少有學行倪元珙督學南畿拔第一益
厲志聖賢之學操行方嚴繩趨矩步學者翕然宗之

有經師人師之目著述甚富綜括帝堯以來至明代
事蹟年排月次爲三部略每部有二十紀又以三部
之年配之易卦以興衰治亂協爻象吉凶作象曆以
五緯二十八宿分直卦爻作測象叙次理學諸儒列
爲八門一一考其行事著書作與斯錄凡數百卷居
湖濱之吳淩去南海最近莊氏刻史羅列諸名士置
諸簡端不問知與不知雋亦廁名其間遂坐死年六
十餘矣雋之表弟董二酉字誦孫亦居吳淩從雋講
濂洛之學踐履真純天懷粹白不言而使人意消亦

預於莊史之難難作時二酉前卒竟坐其家

吳祖錫

吳祖錫字佩遠一字稽田尚書洪五世孫也父昌時吏部文選郎嗣父昌期廣西布政司叅議三世居嘉興故祖錫爲嘉興貢士崇禎末遭家禍痛不欲生家財十萬盡散之以結客慕申包胥張子房之爲人雖知不就意未嘗暫忘天情高邁神觀超然窘急不改其度能以片言使人意移卽怨敵亦願爲之死故屢蹈危難而卒白全乙酉後未嘗家居虎狼之叢蛟蜃

之窟王公曲室節使幕府無所不棲託其中之所存人莫得而測也生平足跡半天下山川阨塞如指諸掌奇材烈士靡不結納自負匡濟大略而無所試之竟齋志以沒丁巳歲死於膠東久之乃克歸葬

王錫闡

王錫闡字寅旭雲之曾孫生而穎異多澁澁之思詩文峭勁有奇氣博極羣書尤精曆象之學明代用大統曆惟疇人子弟習之儒生已罕有知者至西曆尤澁奧非專門授受莫能通錫闡聰悟絕倫覽西人書

輒能明其法數并所以立法之故久而洞徹源底謂
中曆西曆互有短長乃自創新法用以候日月食頗
密於前人諸割圜勾股測量之法他人所目眩心迷
者錫闡手畫口談如指黑白每言坐臥嘗若有一渾
天在前日月五星錯行其上其精專如是所著歷法
歷說大統曆啓蒙解圜三辰儀晷諸書通曆術者視
之以爲專家不逮也爲人孤介寡合古衣冠獨行踽
踽不用時世一錢其志節臯羽所南之流亞也年五
十五卒無子

朱鶴齡

朱鶴齡字長孺弱冠試第一補弟子員亂後閉戶著
書長於箋疏之學先註李義山集錢宗伯謙益見而
稱善貽以僧道源所註本令足成之謙益自註杜集
未就併以與鶴齡令薈萃成書而鶴齡頗立異同謙
益不樂遂各自爲書兩行於世鶴齡晚年尤究心經
學著毛詩通義尚書埤傳讀左日鈔諸書甚有功於
經傳生平殫精書史遺落世事晨夕一編行不識路
途坐不知寒暑人或謂之愚因自號愚菴命所著詩

文爲愚菴小集年七十餘卒

顧有孝

周安

顧有孝字茂倫爲人開美長身玉立善談論喜交遊家釣雪灘陋巷蓬門四方賓至無虛日有孝傾身攬接憂人之憂急人之急旣盡其產復瀕於難不悔也明末吳中詩習多漸染鍾譚有孝與徐白潘陸俞南史周安顧樵輩揚摧風雅一以唐音爲宗有孝選唐詩英華盛行於時後來詩體爲之一變繼又有五朝詩鈔明文英華諸選雅好汲引人有寸長必咨嗟激

賞寒素多依以揚聲故雖布衣窮居而名聞海內周安字安節樂道甘貧蕭然遺世詩格清遠不事雕飾而天趣爛然顧樵字樵水志尚冲素於世無營詩雋永有錢劉風味畫入能品每橐筆遊山水圖而詠之畱連忘返焉

朱明德

計大章王載

朱明德字不遠少治經義有聲從而學文者戶屢常滿隱居爛溪之濱作廣宋遺民錄以見志諸隱者多輕世肆志或以語言文字賈禍明德內介而外和不

爲矯激崖異之行故患難不及潛心學道教授有方
卽俗學而引之理學弟子著籍者凡數百人晚年有
得於性命之旨養克神王至老不衰同隱溪濱者計
大章字采臣亦闇修之士早歲嘗見黃公道周勉之
曰學不愧人字可矣大章服膺終身講學以體認天
理爲宗不多著述年八十餘卒王載字咸平隱居梅
里學不爲人隱不近名亦味道而有得者也

張嘉玲

張嘉玲字佩蔥兄嘉璫辛丑進士嘉玲才藻與兄埒

其初銳意進取旣而與桐鄉張履祥烏程凌貞遊聞
作聖之學翻然嚮往厭薄時趨學使者按部嘉玲已
食餼足及門而不入以謝諸生勇於蹈道講求古禮
而力行之飭躬砥俗非義不履潛修默契日造精微
力排雜學一以程朱爲宗方欲有所論著病作遽卒
年未四十履祥稱其徙義之勇析理之精旣弘且毅
日進而未見其止天天其年斯道之不幸也

嘉玲字佩蔥

日藝而未見其立天天其平淇意之不幸也
平未四十夙辨其卦義之奧休野之辭猶且臻
氏將藝學一以跡未爲宗古俗有但簡善辭於藝卒
而氏許之繪琅玕谷非義不夙習於煇特日哉辭難
食齋且又門而不人以博請主更於詔意講求古甄
非望之學幡然嚮卦頌萬劫蹶學動昔於陪嘉年已
其既餘意藝如猶而與師激蕪夙新鳥豈豈麥貞藝聞

